

清史列傳

冊異





清史列傳 卷四十六

大臣畫一傳檔後編二

祁篤藻

祁篤藻山西壽陽人嘉慶十九年進士改翰林院庶吉士二十年月召還京命仍年散館授編修道光元年命在南書房行走二年三月充會試同考官五月充廣東鄉試正考官三年五月提督湖南學政六年正月召還京命仍在南書房行走七年充文淵閣校理八年正月京察一等二月陞詹事府右春坊右中允十月遷翰林院侍講旋充日講起居注官九年陞詹事府右春坊右庶子十年疏請開缺賞假三月回籍省親召見垂詢篤藻母病狀於三月假外加賞一月假滿母病未愈復具呈由軍機大臣代奏展假得旨傳諭俟伊母病愈再行來京不必限定假期十一年九月銷假命仍在南書房行走十一月補原官十二年二月遷翰林院侍講學士復充日講起居注官六月署國子監祭酒七月因母病疏請開缺得旨賞假一月召諭曰汝母痢疾非不可瘳之症年未七十從此頤養可躋上壽汝年

方壯若卽告歸豈不可惜朕已賞汝假期必可醫治有效毋須遽請終養十月授通政使司副使十三年二月陞光祿寺卿四月擢內閣學士兼禮部侍郎銜十四年丁母憂十六年六月服闋先於五月授兵部右侍郎命仍在南書房行走九月轉左侍郎充武會試校射大臣時圓明園不戒於火篤藻偕王大臣督率官員弁兵撲救出力賞加三級十七年正月署戶部左侍郎八月調戶部右侍郎兼管錢法堂事務尋提督江蘇學政十二月轉左侍郎兼管三庫事務十九年九月調吏部右侍郎均留學政任十月偕署兩江總督陳夔署江蘇巡撫裕謙疏請飭下儒臣敬謹推闡聖諭廣訓內黜異端以崇正學一條撰擬有韻之文頒發各省如所請行十二月御史杜彥士條陳海防各事宜命偕侍郎黃爵滋會同閩浙總督鄧廷楨查辦蘆藻由江蘇赴閩旋擢都察院左都御史二十年二月陞兵部尙書三月奏閩省海防緊要請令總督每歲暫駐泉州督辦南臺福廠戰船修造草率遲延議令迅速修補四月奏查禁海口鴉片烟販首在嚴辦漢奸責成地方官兵盡力查拏並嚴密巡防永杜洋船竄至控制海口請易礮臺爲礮墩並詳陳建立保護及安礮施放之法又以漳州泉州府屬行使洋錢請令沿海地方官於商船進

口時嚴查夾帶其私鑄者治罪並限一年赴官呈繳官爲給價又查奏晉江等縣械鬪情形請嚴緝會首人犯拆毀私設槍樓並奏禁械鬪章程六條一選擇賢吏力圖整頓一查拏兇犯毋輕會營一遴選鄉族各長以專責成一嚴拏鬪匪以絕根株一收繳火器以息兇燄一整飭倫紀以崇教化均得旨允行八月還抵浙江遵旨查奏台州温州各府屬栽種罌粟業經疊次剷除仍令各廳縣隨時履勘台州府知府潘觀藻疲懦無能請勒令休致特旨令革職已革温州府知府劉煜試行票鹽不善被議定罪遣人赴京翻控九月遵旨訊明並無枉屈奏請仍遣戍新疆允之先是英吉利兵船由廣東犯福建各海口經鄧廷楨奏報廈門攻擊英船擒獲奸匪並保奏出力員弁至是命偕黃爵滋仍回閩確查並歷次官兵防堵接仗及英船停泊各情均遵旨查實陳奏十二月回京命仍在南書房行走二十一年三月充會試副考官閏三月調戶部尙書九月命在軍機大臣上行走十一月賜紫禁城騎馬二十三年正月充經筵講官二月命查戶部銀庫所收豫工事例捐項並捐輸經費確數十月命清查內務府見存金銀鏤錢文並另款封儲銀兩十一月管理戶部三庫事務二十六年四月以失察戶部司員得受陋規下部議

處閏五月長蘆鹽政士魁奏前任運司李百齡呈訴懸墊庫項並歷任動墊情形命偕尙書文慶前往查辦尋奏李百齡接收前護運司陳鑑等交代其徵存各項本由前任動墊並據詳明前任鹽政普琳有案惟卸事兩月始行稟詳其本任帑課並非按款清完普琳於交代懸款批令追補並不奏參均請下部嚴議陳鑑於補欠加價輾轉挪撥作爲各商無利運本尤屬牽混取巧應請褫職其率准挪撥之前任鹽政德順一併下部嚴議歷任動墊之運司鹽政均查取職名分別議處其應報解課利等款令新任鹽政趕緊催收並清釐未完商欠均如所請八月充順天鄉試正考官二十九年二月充上書房總師傅七月命以戶部尙書協辦大學士管理戶部三庫事務十月陝甘總督琦善奏丁憂岷州知州陳昌言稟託前任陝甘總督布彥泰賊私各款命前往甘肅會同琦善查辦尋以陳昌言供無確據奏請褫職嚴訊三十年正月奏陳昌言於清查案內虧短倉庫經布彥泰參奏捏詞誣訐所告布彥泰巡邊案內吞銀十萬兩審係全誣請將陳昌言遣戍新疆充當苦差布彥泰雖查無賊私重情惟封疆大吏關防不密辦理清查致多歧誤並令屬員虛報到任任聽家人售賣衣服請下部嚴議並將委辦清查草率之固

原州知州徐采鎮原縣知縣張琅吐魯番同知托克清阿等下部議處又以甘省清查案件舛錯參差未能畫一請飭琦善澈底覆查又查明安定縣知縣胡薦夔稟訐道員楊能格沿途需索夫馬收受陋規係因楊能格查該員倉庫虧短捏詞妄訐請褫職遣戍均從之二月充實錄館總裁四月稽察欽奉上諭事件處六月授體仁閣大學士十月充實錄館監修總裁十二月充文淵閣領閣事咸豐元年正月管理工部事務三月兼署管理戶部事務十二月偕部臣疏請將長蘆河東兩廣閩浙四川鹽政仿照兩淮改票成案各省挨次辦理允之二年二月以捐輸原籍軍餉下部優敘自道光二十三年至是年四屆京察均奉旨交部議敘而自軍興以來夙夜在公殫心竭慮尤爲上所倚重三月恭題宣宗成皇帝神主賞太子太保銜五月奉諭祁寯藻見在園值班嗣後如遇輪應赴庫日期毋庸前往六月六十生辰賜贊綸篤祐匾額並福字壽字各一方壽佛三尊鑪瓶三事嵌玉如意一柄蟒袍一襲蜜蠟朝珠一盤文綺二十四端大小荷包十二對銅玉瓶陳設十件七月因前爲定郡王載銓題息肩圖奪俸半年九月命管理戶部事務三年二月上臨雍充進講官遵保前鴻臚寺卿賈克慎等辦理團練是月因左都御史

花沙納御史王茂蔭先後條陳試行鈔法左副都御史和淳文瑞又請易銀鈔爲錢鈔偕部臣遵議請設立官錢總局將寶泉寶源二局每月鼓鑄卯錢全行運解作爲票本並由部庫應放款項內酌提見銀藉資轉運總計輓轡收發以見銀一百萬兩見錢一百萬串爲率凡官俸兵餉及各衙門支用雜款分成搭放詔如所請又以御史富興阿條陳指令京官捐輸並裁減王公藍甲偕部臣遵議藍甲米石原以養贍王府包衣及分府宗室之用驟議裁撤減成未免有妨生計應毋庸置議允之先是二月粵匪竄撲江寧省城篤藻之弟江寧布政使宿藻以守城病歿迨城陷後其家人趙興董位乘間出城四月到京具陳城內文武各員殉難并見在賊匪情形篤藻以聞五月以散館閱卷錯誤奪俸一月八月以河南懷慶府解圍賞加一級十一月偕部臣遵議巡防王大臣等奏請推廣加鑄當百至當五百當千大錢旋以行使不便奏罷之是月恭題孝德顯皇后神主十二月以歷次捐輸軍餉下部議敍自道光十七年至是年歷充拔貢會考閱卷大臣一次覆試宗室舉人閱卷大臣四次覆試順天舉人閱卷大臣二次補行覆試順天等省舉人閱卷大臣五次覆試新貢士閱卷大臣五次殿試讀卷官一次新貢士朝考閱

卷大臣七次庶吉士散館閱卷大臣四次教習庶吉士三次大考翰詹閱卷大臣
二次考試試差閱卷大臣二次考試漢御史閱卷大臣三次入直南書房除出差
回籍外歲蒙頒賞福壽字及珍玩文綺等件四年六月以積勞成疾屢請假調理
八月陳請開缺奉硃批卿宣力有年深資倚任著不必開缺仍在家安心調理亦
不必限定假期總宜氣和心平勿生忿憤自可速痊過數月後再行酌量十一月
以病未就痊復請開缺諭曰祁寯藻三朝舊臣在內廷行走有年兼管部務勤慎
趨公深資襄贊茲據奏稱醫治數月尙未痊愈懇請開缺情詞肫切若不允所請
轉無以安其心祁寯藻著以大學士致仕俾得息心靜養以副朕優眷耆臣至意
五年山東在平馮官屯逆首李開芳全股蕩平河北肅清上念寯藻前在軍機處
懋著勞勩下部議敘六年宣宗成皇帝實錄聖訓告成賜食全俸十年七月英人
犯天津上將狩木蘭寯藻密疏切諫九月復疏言英人此次狂悖無理已極卽令
就撫其需索無厭動多牽掣必不能日久相安而天津海口偏近京師非廣東省
城江蘇上海可比豈堪數至驚擾撓我事權竊念天下形勢以關中爲勝自黃河
南徙則以燕薊爲勝今河流北歸故道又以西北爲勝雍州土厚水深城池雄闊

且駐防人材輩出官兵整練與都城八旗不相上下若因其地勢拓此宏規外無海寇之虞內有山河之固此亦窮變通久一大機會也又言釐捐一事窮民未免受累南省尙有水路運載北省則皆肩挑負販備極困苦所得甚少所捐甚多請將北省釐捐先爲停止報聞十一年穆宗毅皇帝御極諭曰予告大學士祁寯藻忠清亮直學問優長著來京聽候簡用寯藻因疏言臣受三朝知遇之恩至深且厚值此時事艱危稍有所見何敢緘默不言謹條列數事敬爲皇上陳之一保護聖躬以崇帝學也伏維皇上纘承大統兩宮皇太后朝夕保護懿訓常親不獨寒煖起居隨時調適卽心思耳目亦可默收養正之功自古帝王之學與儒生異今日進講之方亦與平時書房功課不同蓋讀一句書卽有一句之用講一件事卽得一事之宜臣愚擬請侍讀儒臣除每日功課外先擇取五經四子書中有益聖心治道切要之語講解數條義取明簡不可太繁更取史籍所載古聖帝王往事明顯易解者日進一二條大致分仁正勤儉四端如禹泣罪湯解網文王掩骼等類並令畫院按照故事作爲畫幅復綴講說數語於進講後卽請黏貼黼座宴息之所以備隨時觀覽心不厭則易入力不勞則有功此亦古人左圖右史之遺意

也至於天下輿圖亦宜漸次口講指畫明其山川道里關隘夷險然後恭舉列聖嚴恭寅畏之心艱難創垂之意明白陳說積時既久衆理貫通所謂日就月將學有緝熙於光明也至左右近侍尤宜擇老成謹愨之人每日侍讀時勿令攙雜言語其有導引嬉戲呈進玩好滑稽佻巧便佞者難逃兩宮皇太后洞鑒之中自必力與屏斥不少姑容庶幾聖德益致純粹而聖學日崇矣一綏輯民心以清盜源也粵匪跳梁已逾十載東南省分蹂躪殆徧推原其故雖由奸民犯法亦由吏治廢弛養癰貽患州縣爲親民之官誠能廉正勤明則吏胥不敢欺謾聽斷自無偏枉官民相信宵小潛蹤縱有竊發隨起隨滅卽令辦理團練必不致聚衆把持辦理捐輸亦不致抑勒生事前者天津縣知縣謝子澄六合縣知縣溫紹原皆以民情愛戴捍衛一方生而立功歿而優卹其明徵也今民生困憊極矣其被賊擾害處所業已被蠲貸之恩卽完善地方亦不勝徵調驛騷之苦卽如礦稅一端無業遊民易聚難散動輒釀成巨案且所得無幾所害實多似宜停罷以弭後患釐捐之設雖爲軍餉起見而窮民受累實深其勢縱難悉罷亦宜於通衢要口酌量抽留其餘僻地小商似應概免擾累此所謂捐小利而施大惠山陬海澨咸頌皇仁

自必愈形鼓舞今之急務惟在固結民心而固結民心必先體恤民隱臣聞湖北巡撫胡林翼辦理清漕之法於兵燹之後催科不擾而額徵易完官民兩便此當今輓救漕政之善法也擬請江浙諸省漸次廓清之後卽須仿照湖北辦法一洗從前勒折浮收包攬侵蝕等弊庶東南民困日蘇莠民不致藉口倡亂而國家漕運之利亦可經久無弊矣一請重守令以固民心也民心之得失視乎州縣之賢否而州縣之賢否惟知府知之最悉知府州縣能使民心愛戴而猶犯上作亂者未之有也各省督撫司道大員黜陟悉聽聖裁優劣無難立判至知府州縣職分較卑若非大吏認真考察吏治何由整飭大抵循吏廉正自持廉則不肯妄取豈能應酬正則不肯干求豈能迎合爲大吏者察其官聲覈其詳案知其才而舉之舉數人而通省風氣爲之一變否則民之所親上司之所厭也同官之所忌也或以爲迂拘或以爲才欠開展含混註考因而黜之黜數人而通省風氣亦爲之一變在知府尙不致輕易甄別州縣則改佐貳改教職投閒置散末由自見誠可惜也今欲重守令必以民情愛戴爲憑若聽斷不公操守不潔而欲沽名邀譽勢必不能以臣所知乾隆年間山西知縣汪志伊嘉慶年間四川知縣劉清皆因廉明

有聲特邀聖製詩章以獎勵之洊擢至總督布政使劉清更由布政使改官總兵以其文武兼資故不限一格也道光年間知府無論特簡部選外陞均蒙召見州縣亦每蒙召對咸豐初年州縣亦有豫備召見者列聖相承心法治法卽此一端具有深意蓋以親民之官職分雖微關係綦重偶蒙召對於聽斷操守大端加以策勵卽中人之材亦知感懼被濯勉爲良吏風聲所樹各省大吏風氣亦爲之一變所舉如此所劾可知吏治澄清民心自然固結盜賊自然潛消且今日之守令卽可爲他日之督撫未有始基不慎而能表率屬員者也應請敕下各省督撫隨時認真考察大計舉劾亦必陳明優劣實跡不得以空言註考以符定制軍興十載捐例頻開仕途流品較雜雖其中可膺民社者甚多而由科甲出身者轉形壅塞部選之缺及外省請補人員似宜量爲變通不致互有滯礙請敕下部臣妥議章程以昭公允庶人材各效其長而庸劣者亦不得濫竽貽誤於吏治民心似有裨益也一請詔開制科以收人才並請復各省駐防文舉人生員之例以廣八旗登進之路也軍務未息南北各省停科太多或數科併爲一科或臨期又復停止按科舉行者惟順天山西陝甘等省此中人材湮沒不少其安分積學之士無由

上達而性情不定挾才欲試又恐誤入歧途外則海洋招致內則盜賊擄脅銳而走險甚可慮也以臣愚見擬請特開制科仿照康熙乾隆年間博學鴻詞之例詔下中外大臣及有言責准奏事諸臣各舉所知而策以經世之學進士舉貢生監皆得與選其布衣中有品學素著才識優長者亦許覈實保薦此亦古人茂才異等直言極諫之遺意也惟所保之人必須真知灼見臚陳所學實據毋得含混冒濫空言保薦至京師八旗各省駐防如有研習經史通達治體軍務者並由都統將軍副都統等覈實保薦統限一年內咨送到京禮部彙齊造冊具奏恭請欽派大臣考取候旨錄用其有道路阻滯限期外始到京者另作一次考試臣惟時事艱危非才不濟而盤錯之會尤人才奮興之時卽如湖南一省兩廣總督勞崇光兩江總督曾國藩湖北巡撫胡林翼皆由翰林洊擢封疆見辦軍務地方大員如左宗棠劉長佑彭玉麟李續宜皆此數年間仰蒙先皇簡拔內擢京卿外擢巡撫其死綏之臣如江忠源羅澤南李續賓等忠義衆著聲名卓然一省如此他省可知各省督撫果能認真延訪循名責實必有碩學奇才爲國家宣力奏績者文則整頓地方武則振興軍務搜羅愈廣收效必多士氣由此日興賊勢由此日蹙轉

移之機大有關繫然非朝廷特開一科旁求俊乂亦不能四方輻輳薈萃一時也至各省士民中如有武略過人或團練著有功效者並請由各督撫督率鎮將留心訪察拔入標營備用其中果有才識卓犖堪勝大任者准令破格保奏再各省駐防向有考取文舉人生員之例至道光年間改爲繙譯駐防八旗中通達漢文積學之士無路上進人才難得誠爲可惜卽如瑞常倭仁皆係駐防科甲由翰林洊擢正卿其餘京外各官由駐防科甲出身者亦復不少臣任江蘇學政時考試駐防生童文理優長者頗多方今時事艱難需才甚急各省遺才尙須搜取八旗舊例更宜疏通臣愚擬於駐防繙譯科甲外請復駐防考取文舉人生員之例與繙譯一體錄用以廣登進從此八旗人才日衆足備器使矣一請速剿山東河南賊匪並嚴防山西陝西要隘以衛畿輔而肅餉道也竊聞粵匪自竄擾江浙以來延蔓日衆雖江南有曾國藩江北有袁甲三暨江蘇安徽浙江巡撫分扼要害屢次克復郡縣賊勢漸蹙仍恐廓清尙須時日至山東河南兩省比年捻匪土匪勾結搶掠出沒無時漸漸侵及河北地方此實畿輔之大患斷不可任其盤踞巢穴恣肆橫行也聞僧格林沁勝保各統大軍屢有勝仗擒剿計已不少河南山東巡

撫亦各督兵練剿辦但恐此剿彼竄兵去賊來而防河要口又恐兵力單薄偶被逸賊搶渡其勢更難撲滅又聞聯捷等在大名一帶剿匪此則直隸重地尤當及早肅清也至山西陝西皆與河南接壤雖有河山之險而隘路處處可通前此江南通寇卽由蒲州平陽潞安一帶竄入直境幸而剿滅淨盡然前車之鑒可爲寒心且山陝兩省尙屬完善之區京餉及各路軍餉皆所取給設有疏失餉道阻隔不堪設想應請敕下統兵大臣及直隸總督河南山東巡撫合力會剿勿令滋蔓蓋必東豫肅清而後畿輔安謐山陝無事而後餉道暢通方今軍務莫急於此臣聞副都御史張芾見在幫辦陝西團練臣知其前任江西巡撫守城已著成效卽徽州防堵亦無大失事惟須專其責成俾令獨當一面必可有益又聞前任雲貴總督吳振械告病見寓西安省城該督曾任陝西四川大員熟悉地方情形可否會同陝西巡撫辦理防堵又有前任四川總督王慶雲曾任陝西山西巡撫見以告病寓汾州府前任順天府府尹蔣琦齡曾任陝西首府見以養親寓澤州府二人於澤潞平定遼州一帶地勢民情亦必諳習可否會同山西巡撫辦理防堵伏候聖裁至南省用兵日久必須多方激勵以振軍心臣思江蘇安徽死事之臣名

望最著者如江蘇巡撫吉爾杭阿安徽巡撫江忠源道銜六合縣知縣溫紹原或親督官兵攻城陣亡或身經百戰守城盡節或以小邑危城屢挫賊氛明知無援死守不去又如提督張國樑自廣西投誠以來深明大義衝鋒陷陣屢建奇功卒以力竭捐軀此數臣者可否特旨再加褒卹遣官於殉難處所致祭以作戰守將弁感奮之氣其各省陣亡殉難曾邀恩旨褒贈建祠者並請敕令地方官致祭此亦激勵軍心之一端也一敦崇節儉以培元氣也我朝休養生息二百餘年列聖深仁厚澤漸致豐亨豫大至乾隆時爲極盛嘉慶初年川楚教匪滋事連歲用兵耗帑七千餘萬兩庫儲不敷始開捐例而水旱賑貸河工經費仍復日不暇給宣宗成皇帝建極之初御製聲色貨利論所以涵養聖心訓誡後嗣之意至深且切三十年中減免貢獻罷斥玩好無益之費西苑三海圓明園三山工程大半停止又出內務府帑金數百萬兩以實部庫此誠古帝王克勤克儉之心法也是以咸豐初年先皇特諭館臣纂修實錄恭載崇儉一門宣昭聖德垂示天下後世繼志述事合揆同符自軍興以來各省餉需約略所費萬萬有餘其中實用實銷者固多而虛糜者亦恐不少比年京餉不敷旗兵困苦而都城內外風氣轉益奢靡若

非朝廷示以節儉何以輓回積習我皇上躬膺寶祚時值艱難罷貢卻珍已聞恩諭仰見宸衷默契尙儉黜奢之至意竊念聖駕恭奉梓宮還宮憂勤惕厲日昃不遑御園修葺自必緩圖卽日後經營亦殊匪易且遊豫隨意則啟宴安之漸資膳多欲則啟進奉之漸杜漸防微正在此日擬請敕下工部內務府會同查勘園庭及三山坐落等處繚以周垣敬謹看守切勿更議繕修其香山健銳等營操練處所仍照舊章辦理南苑歲修亦請暫止其餘一切修造可停者卽停可緩者卽緩至各省織造關差進奉之件並請敕諭內務府大臣查覈需用緩急量爲裁減俾中外人心皆知深宮儉約慎懷永圖庶奢靡之風漸斂帑餉不靡而元氣日培日厚矣總之致治之要本諸聖心書曰非知之艱行之惟艱詩曰靡不有初鮮克有終方今治象清明彰善瘴惡大小臣工孰敢不振刷精神力圖報稱第恐數年之後奉行者視爲具文漸就懈弛而揣摩逢迎之習緣隙而生卽言路亦恐因之而塞竊見乾隆初年直隸總督臣孫嘉淦有三習一弊之奏其言剴切深中事情大致謂目習於所見耳習於所聞心習於所安以此三習卒歸一弊其弊維何遠君子而近小人而已疏入上嘉納之次第施行十一月疏薦科爾沁親王僧格林沁

忠勇樸直終始如一前兵部侍郎王茂蔭遇事敢言不避權貴報聞十二月命以大學士銜授禮部尙書同治元年二月到京是月皇上入學讀書篤藻奉兩宮皇太后懿旨偕大學士翁心存尙書倭仁編修李鴻藻在弘德殿授讀篤藻自陳衰病懇辭部務上不許令免其帶領引見並免派一切差使尋進呈摘錄經史二帙上嘉其條分縷晰切要簡明命陳弘德殿以資講肄四月以山西辦防需才疏薦前大理寺少卿田雨公太僕寺少卿徐繼畬江蘇巡撫趙德轍榆次縣知縣俞世銓絳州直隸州知州李廷樟奉天知縣張保衡六員時刑部定擬已革兩江總督何桂清罪名照臨陣先逃斬監候律上從重擬爲立決六月篤藻請仍照本律定擬上從之七月以北省軍務緊要請欽派科爾沁親王僧格林沁節制山東河南山西陝西四省以一事權是月雲南學政張錫鏞奏請崇祀文宗顯皇帝於大饗殿以合孝經明堂之義篤藻偕王大臣等遵旨會議以考之今制稽之古禮事多窒礙未可依行上聽之九月文宗顯皇帝奉安定陵禮成賞加二級尋因病請開缺得旨賞假三月十一月上讀大學日講帝鑑圖說篤藻具疏反復推闡爲人君止於仁一言並進呈朱子小學陳宏謀大學衍義輯要杜詔讀史論略三書疏云

典學之要誦讀爲先而講解之功更爲切實蓋非誦讀不能習其文字非講解不能通其義理也大學一書皇上業已讀畢凡制治保邦之道用人行政之原胥於是乎在要之爲人君之道在止於仁一言而已治國平天下兩章言仁者六而終之以未有上好仁而下不好義蓋仁者必以仁親爲寶故能愛人能惡人不仁者則好人之所惡惡人之所好矣仁者必以貪戾爲戒故忠信以得之不仁者則驕泰以失之矣仁者以義爲利不以利爲利故以財發身不仁者則以身發財菑害並至矣千古治亂之機判於義利而義利之判則由於上之好仁不好仁也卽如近日所講帝鑑圖說下車泣罪解網施恩澤及枯骨等事斯卽帝王仁心所見端也至若納諫求賢尊儒遠佞則仁親爲寶能好能惡之說也露臺罷工裘馬卻獻則以義爲利不以利爲利之說也臣愚竊謂帝鑑圖說講畢卽宜進講輿地之學大清會典中有皇輿全圖各省府州廳分圖山川疆域形勢開卷瞭然篇幅簡明易於指畫並有禮制武備天文等圖可資博考又耕織圖則農桑之事衣食之原纖悉具陳宋馬遠幽風圖嘉慶年間取以聯句內府畫本石刻具在可資檢閱欽定月令輯要授時通考二書皆足與耕織幽風等圖互相發明皇上讀書之暇隨

時講求庶幾知稼穡之艱難懷守成之不易也又疏薦端木埰鄭珍莫友芝閻汝弼王軒楊寶臣經行修明有體有用寶臣兼通天算疏云臣恭讀上諭見在中外臣工薦舉賢才尙不乏人而山林隱逸以及末秩下僚或以德行或以政事或以文學各擅所長湮沒不彰殊爲可惜允宜及時登庸以副闢門籲俊之典著京外三品以上各員並直省學政悉心訪察臚舉所長咨調來京候旨考試視其器識破格錄用不得視爲具文等因欽此仰見皇上典學求賢敷奏明試之至意臣竊惟近來考試詞章之學尙多根柢之學甚少士不通經不足致用而通經之學義理與訓詁不可偏重漢儒許慎說文解字鄭康成詩禮箋注各有師承羽翼經傳厥功甚鉅歷代名臣碩彥由此其選至宋周程張朱數大儒因注疏以闡明義理學術人心允足範圍後世此大學正心誠意之功必本於格物致知也後學不察往往以訓詁專屬漢唐諸儒以義理專屬宋儒遂使聖門四科畫分界限卽如制藝代聖賢立言明季國初本多經意而後來流弊漸就空疏非立法之不善乃學術之日歧也方今聖學初基屢奉諭旨釐正文體整飭考試臣愚竊謂經術之士知之者希亟應先爲表彰俾士氣文風有所矜式亦吏治儲材之亟務也臣素知

寒士中有器識文藝者數人雖不遽言德行而由文學以達政事各有所長堪資器使若知而不舉不特貽蔽賢之譏實重負朝廷咨訪之意復以久病請開缺得旨再賞假三月二年十月偕倭仁李鴻藻疏云皇上冲齡御極智慧漸開當此釋服之初吉禮舉行聖心之敬肆於此分風會之轉移卽於此始則玩好之漸可慮也遊觀之漸可慮也興作之漸可慮也嗜好之端一開不惟有以分誦讀之心卽海內之窺意旨者且將從風而靡安危治亂之機其端甚微而所關甚鉅可無愼乎方今軍務未平生民塗炭時艱蒿目百孔千瘡誠如聖諭正君臣交儆之時非上下恬熙之日也伏願皇上恪遵慈訓時時以憂勤惕厲爲心事事以逸樂便安爲戒凡內廷服御一切用項稍涉浮靡概從裁減雖向例所有不妨量爲撙節如是則外物之紛華不接於耳目詩書之啟迪益斂夫心思將見聖學日新聖德日固而去奢崇儉之風亦自不令而行矣上優詔褒答焉十一月疏云臣聞國史館循吏傳自嘉慶年間編輯後久未續纂近年封疆大吏以此奏請者亦甚罕見且自軍興以來徵兵籌餉幾視吏治爲緩圖不知地方果得一賢有司平日弭盜安良化民成俗實足以消患於未萌其曲突徙薪之功不在敵愾捐軀者下現在城

守陣亡各員均蒙隨時賜卹或奉特旨宣付史館此等地方循吏功在無形譽傳衆口若不及時表彰致令湮沒何以昭激勵而勸後來應請旨飭各省大吏加意訪查政績官聲遺愛在民者奏明並咨史館編入循吏列傳以資觀感臣更有請者竊見各省州縣供軍需辦團練不得不藉資民力其假公濟私拂衆斂怨者無論已卽一二清潔自好者亦不過踴勉辦公先其所急設卡抽釐方慮聚衆滋事團練築堡又虞負固抗糧救過方且不遑於民生疾苦地方利弊勢更不暇兼顧苟非至誠之心兼濟變之才安能用民財力而民不怨畔故至今日而言循吏操術爲至難用心爲更苦也其已故者固應特予表揚其見任者尤宜急加褒勉俾得殫竭心力以衛民生應請敕下中外大臣保舉循吏確覈品行臚列事蹟奏備簡用其有伏處之士潛修力行堪膺循吏之選者如確有見聞亦准一體保奏並以原任同知劉大紳按察使李文耕大順廣道劉煦循聲卓著請宣付史館入循吏傳直隸任邱縣知縣張光藻獻縣知縣陳崇砥知縣王蘭廣山東知縣蔣慶第山西徐溝縣知縣程豫汾陽縣知縣吳輝祖及江南優貢端木埰山西舉人秦東來等請送部引見均得旨允行三年七月復以病請開缺並退出內廷差使命開

禮部尙書缺仍以大學士銜在弘德殿行走十月瀝陳病勢請致仕停俸諭曰大學士祁雋藻奏衰病日久難以起假入直籲懇致仕一摺覽其所奏情詞真切若不允其所請轉不足以示體恤祁雋藻著准其開弘德殿差使以大學士致仕仍加恩支食全俸以示篤念耆舊至意四年五月以科爾沁親王僧格林沁剿捻戰歿於曹州畿輔震驚疏陳防剿之策薦總兵余承恩及直隸州縣十員備委任五年卒遺疏入諭曰予告大學士祁雋藻學粹品端忠清亮直由翰林入直南書房洊擢正卿贊畫樞務簡任綸扉總理部務疊受先朝知遇之隆克慎克勤無忝厥職咸豐四年間以樞務積勞因病開缺朕御極之初蒙兩宮皇太后簡用耆臣重加倚畀以大學士銜補授禮部尙書令在弘德殿授讀朝夕納誨啟沃深資旋復因病予告在家食俸老成碩望中外皆知方冀頤養安和遐齡克享遽聞溘逝悼惜殊深著賞給陀羅經被派鍾郡王帶領侍衛十員卽日前往奠醊加恩晉贈太保照大學士例賜卹入祀賢良祠任內一切處分悉予開復應得卹典該衙門察例具奏靈柩回籍時著沿途地方官妥爲照料伊子翰林院編修祁世長著俟服闋後以侍讀用伊孫祁友慎著賞給舉人准其一體會試以示朕篤念耆臣至意

尋賜祭葬予諡文端子世長工部尙書

周祖培

周祖培河南商城人嘉慶二十四年進士改翰林院庶吉士二十五年散館授編修道光元年充順天鄉試同考官二年充雲南鄉試正考官四年丁父憂七年服闋十二年八月陞國子監司業十二月陞詹事府司經局洗馬充文淵閣校理十三年正月充日講起居注官二月擢翰林院侍講七月大考二等賜文綺轉侍讀十四年二月京察一等記名以道府用三月陞右春坊右庶子八月陞翰林院侍講學士十五年六月命協同批本十月充順天武鄉試副考官十七年八月提督陝甘學政十二月轉侍讀學士十八年四月陞詹事府詹事六月丁母憂二十年服闋二十一年十月補原官充經筵講官十二月充文淵閣直閣事二十二年稽察左翼宗學二十三年四月陞內閣學士兼禮部侍郎銜十月充順天武鄉試正考官十二月稽察中書科事務旋授禮部右侍郎二十四年二月兼署兵部右侍郎三月轉禮部左侍郎八月以鄉試搜檢不嚴罰俸九月充武會試監射大臣十二月調工部右侍郎兼管錢法堂事務二十五年三月充會試副考官四月以兵

部堂官違例派署掌印又以司官索詐書吏吸食鴉片煙祖培奏參不實命革職留任九月充武會試正考官十月調刑部左侍郎二十六年正月命偕戶部尙書賽尙阿馳驛往江南查勘江防善後事宜奏言長江自鵝鼻觜西抵烏龍山其間數百里沿江築隄安礮設兵守衛者數十層其礮有千斤數千斤萬斤者其弁兵有施放大礮者防護者接應者聲勢連絡足資捍禦第恐日久懈生視爲具文應請旨飭令按時操練礮臺隨時修葺兵弁隨時更易毋得稍有廢弛六月差竣回京旋充浙江鄉試正考官十一月偕戶部左侍郎柏棧順道江蘇查辦事件十二月以御門大典到班遲延罰俸二年二十七年以捐銀備賑下部優敘三十年二月充實錄館副總裁三月充會試知貢舉尋條陳四事略曰一立政貴乎稟承也從來乾綱獨斷必能自得師能自得師莫善於式求成憲我朝立政之要用人之法洪纖巨細無不備載於列聖實錄之中見在內閣照例每日進呈以備皇上按時恭讀典至鉅法至善也惟卷帙浩繁難於記誦伏求皇上幾餘乙覽之時親加選擇凡有關於觀人敷政之法納言決事之宜以及防微杜漸籌慮深遠者悉命南書房翰林敬謹繕寫另備一冊以便隨時披閱伏思利害所關今昔同轍容有

昔之所利不盡利於今者未有昔之所害不爲害於今者容有昔所欲除之害至今猶未盡除者未有昔所應防之害至今轉可不防者惟皇上成法在胸以應幾務庶利害瞭如指掌而興廢可決於一心也一致治以除積弊也時弊之重莫過於欺飾自督撫以至末吏皆難逃此病卽如各省府州縣之倉庫以及義倉常平倉上司有年終盤查之責同官有交代出結之例有無虧短不難立破何至日積月久而弊重難返總由上司專徇情面以考覈爲虛文同官則互相營私以結報爲故事或不知其實而姑爲含容或明知其非而故爲隱匿此各省所以有虧短以致今日有清查之令也至河工漕務尤當以覈實爲要一涉虛浮弊端百出去歲河南六堡之漫口漕船回空之遲滯未必不始於一時一事之欺終至連年累月之害也惟皇上責成大吏力懲其欺飾之習以率屬吏則事皆求實而積弊可漸除矣一澄敘州縣以衛民生也國以民爲本而州縣爲親民之官民之疾苦知之民之身家繫之州縣得人而民安民安而天下治矣無如此途甚寬賢不肖雜處其中其貪婪殘酷者固爲民賊其有貌似有才稱爲能吏事上則口舌便捷任事則剛愎苛求或縱容胥役以滋擾或任聽家丁以營私有治民之名而有害民

之實又有因循疲玩闖茸無能者坐高堂以養尊竊利祿以便己而嗷嗷之衆漠不關心此玩視民瘼者其害民尤甚每見一縣之中偶遇災荒而哀鴻徧野弱者轉乎溝壑強者去爲盜賊其爲之上者平時撫綏無術臨時賑濟無方迨至怨咨交作上司不得已而加以參劾而民之瘡痍已不可復問矣伏乞皇上嚴責直省大吏各統所屬自上迄下隨時考察儻有作奸犯科之員該上司徇隱庇護以致地方滋生事端經言官彈劾卽將該督撫從嚴懲處務使親民之官以民爲重則所以奠億兆而廣皇仁者孰有重於是哉一修明武備以資弭盜也武備之設所以衛民國家設立營制自京城以及外省星羅碁布每歲不惜千萬帑金教養訓練平時資其緝捕有事賴以禦侮若緝捕先行廢弛更何望爭先禦侮耶近來各省搶劫之案層見疊出或爲害行旅或行劫鋪戶甚至霸據鄉鎮百十成羣隨在竄逸如湖南武岡一帶之匪徒滋擾其始亦不過盜賊耳苟有以豫防之何至猖獗若是竊見各省每遇盜賊之案督撫大吏往往將微末營弁摘參與地方文武一併勒緝名爲從嚴辦理不數日後經地方文員購買眼綫將案內人犯緝拏數人遽以文武協緝獲盜過半一併奏明開復相率效尤幾成錮習武弁何由知做

盜風何由得息民生何由得安伏思州縣等官刑名錢穀責任綦煩緝捕盜賊係其職分之一端若營員則緝捕係其專責緝捕未能平日之訓練懈弛已可概見相應請旨嚴飭各省督撫將軍切實整頓賞罰兼施務使營伍員弁皆知責有攸歸無可推諉於捕務日有起色則盜風可靖而閭閻亦漸增安謐矣疏入諭曰周祖培陳奏一摺致治首宜除弊而除弊先當戒欺爲大吏者亟當洗心滌慮率屬秉公而澄敍官方尤在嚴察牧令斷不可任意姑容置民生於不問衛民莫先於緝盜尤宜實力整頓務須日有起色其設防之處該督撫等各宜隨時修葺有備無患至於列聖實錄每日進呈恭讀朕自當默識編勒所請飭行繕錄之處著毋庸議十二月署刑部左侍郎咸豐元年五月陞刑部尙書充實錄館總裁二年三月充會試正考官七月以題定郡王載銓息肩圖奪俸半年十月賜紫禁城騎馬十一月因戶部籌餉二十餘條所議之款尙恐緩不濟急奏言道光二十一年河南河工城工捐輸案內有以錢折銀照海疆章程一體辦理者彼時輸將甚爲踴躍此次豫省開捐聞人數寥寥若不格外加以鼓勵難期奮勉應請查照河工城工章程變通辦理又聞各省巨富者實不乏人查見在漢口鎮爲商賈輻輳之區

猝遇賊至擄掠一空與其委而資敵何如輸以報國凡該富戶等諒切同心也至於畸零富戶力量無多按戶派捐所湊無幾事無補於國而怨先斂於民伏乞諭飭各直省督撫大臣確查巨富之家數十萬及百萬以上者妥爲勸諭務令激發忠愛力圖報效一戶獨捐之數即可抵數百戶湊捐之數一經奏報自可立沐殊恩其不願仕進者或俟軍務告竣之後照數發還亦無不可第必須由該督撫親自辦理斷不可假手屬員以致私受情賄匿多報少弊竇叢生疏入得旨允行三年二月奏言軍興以來糜費帑金至二千數百萬之多軍事一日未竣帑餉一日難省總應寬爲籌備以期無誤要需竊思錢之爲用正以濟銀之不足若錢果能充則八旗每月之兵餉以及各軍用項皆可以錢代銀錢無不足銀自有餘度支可無虞支絀惟近來銅斤短少不能增卯多鑄竊聞熱河避暑山莊及北海之瓊島春陰均有銅房及圓明園之西洋樓銅盤銅管銅牛銅馬之類因年久失修損壞無用儻皆聚集以資鼓鑄則可易無用爲有用再刑律載軍民之家私蓄銅器並聽赴官呈賣每斤給銀七分增減隨時若故匿在家不赴官者笞四十咸豐二年八月曾經御史條奏戶部會同工部覈議以京城市賣銅器較多酌定五斤以

上銅器無論黃白紅銅均行禁止是民間私蓄銅器律應赴官呈賣其京城大小官員之家若銅盆銅鑪之類散之則有限聚之則充裕凡五斤以上銅器似應赴局呈繳且此等銅斤曾經煎鍊較之滇黔運京生銅良頑迥別資以鼓鑄所獲必數倍低銅更可仿照漢唐成法當十當百當千之大錢因古制而酌今宜又在部臣之妥爲籌議也疏入命戶部會同內務府查議五月要犯劉秋貴死於刑部承審司員未能審出實情祖培坐降三級調用尋補都察院左副都御史七月稽察左翼宗學八月奏言竊惟賊匪滋事以來屢奉上諭命各省皆辦團練並築寨濠濠嚴守要隘仿照嘉慶年間堅壁清野之法良以不築寨堡不能堅壁不堅壁不能清野不堅壁清野不足以禦賊乃各省自奉旨以來有團練之名而無團練之實卽有一二處認真者亦不過聚集鄉民加以操演而於堅壁之法並未講求卽如懷慶被賊兩月之久垣曲近在接壤絳縣曲沃相隔二三百里各該縣豈眞聳聳一無聞知果能實力奉行團練寨堡林立賊且舉步皆難何至懷慶解圍未及旬日而連陷數城如入無人之境所謂防守直同兒戲固由該撫等闕冗無能失機玩寇而該州縣之團練廢弛並不認真辦理亦可概見今賊匪竄突靡定各府

州縣大抵皆毫無豫備賊至卽潰全仗官兵追剿而尾其後不能截其前勢難剋期盪平夫剿賊貴乎兵而防守必資乎民今欲用民必使民有可憑而後民志定非設立寨堡不爲功議者或謂城且失陷寨堡何足恃不知勢孤者力弱勢聚者力强今以一縣論小者百里大者百數十里而所憑者僅一城耳如一縣內而有數十寨堡不啻一縣而有數十城也四面障蔽賊且不得徑犯何失之有又或謂需費甚多科派滋累夫科派誠滋累矣何不可量力而捐資也查平原屯堡所費不過數百金一堡內可容數百戶以數百戶之民籌數百金之費尙不甚難且富者捐資貧者出力其費更可省約惟在各府州縣誠心勸諭之精心區畫之裁汰冗費不假吏胥斯民皆鼓舞爲之耳此法一行有數利焉比廬聚族棊布星羅一塞堡有警各寨堡互應或邀擊或夾攻令賊無可入之境一利也百姓驚惶由於無所倚恃今寨堡旣建人心皆固不患流離不虞裹脅二利也米穀牲畜悉聚於各寨堡內令賊無可掠不戰自困三利也每寨堡約數百戶每戶抽壯丁一二人設長以約束之定期以訓練之無事仍可兼顧耕作有事則悉成勁旅四利也募兵於倉猝無論其不足深恃卽能得力而一邑所募壯勇能有幾何今寨堡旣成

人人可以爲勇卽人人可以爲兵按戶抽丁可以數萬計五利也邪教蔓延土匪覬覦伏而未動者恐復不少今以各寨堡之民自爲巡防互相糾察保甲之法就此施行不獨大寇可滅並盜賊漸除六利也至設立寨堡各事宜相應請旨嚴飭各督撫責成賢能有司會同紳民迅速遵辦如有怠玩從事不善經理反滋擾累者立予參處疏入得旨允行十一月署工部左侍郎尋陞工部右侍郎兼管錢法堂事務十二月以疊次捐備軍餉下部優敘旋調吏部左侍郎四年二月陞都察院左都御史十一月陞兵部尙書五年八月署兼管順天府府尹事務六年二月署工部尙書九月充武會試校射大臣十一月宣宗成皇帝實錄聖訓告成祖培以續辦稿本賞太子太保銜是月調吏部尙書八年四月會辦五城團防七月復充經筵講官九月命以吏部尙書協辦大學士十月署戶部尙書九年二月調戶部尙書三月兼署吏部尙書四月充武英殿總裁八月充順天鄉試正考官九月充大考翰詹閱卷大臣十年二月署理戶部三庫事務三月充會試正考官七月命總辦京城團防事宜祖培酌擬章程六條奏入一查戶口以別良莠一勸保衛以聯衆志一任官紳以專責成一協營汛以聯臂指一設水會以備不虞一請幫

辦以資助理八月文宗顯皇帝巡幸木蘭命祖培留京辦事十二月授體仁閣大學士管理戶部事務十一年二月命在紫禁城輪流住宿三月奏保京員何元普赴河南軍營差委四月議覆河南之河北三府捐輸應仍歸河南巡撫委員一手經理七月文宗顯皇帝龍馭上賓穆宗毅皇帝御極命祖培在京總理喪儀十月以怡親王載垣等擬定祺祥年號字樣意義重複奏請更正諭曰大學士周祖培奏建元年號可否更定一摺建元大典昭垂萬世前經載垣等擬進祺祥字樣意義重複本有未協茲據周祖培奏請更正實屬關心典禮周詳慎重爰命議政王軍機大臣恭擬同治二字進早其以明年爲同治元年布告天下是月充實錄館總裁尋偕大學士賈楨等奏政權宜操之自上及皇太后召見臣工禮節並一切辦事章程疏載楨傳十一月奏言長蘆鹽課近年銷數缺短兩淮缺額尤甚皆委其故於逆匪滋擾前經督臣奏請於就近地方設場收稅每年所得亦屬無多兩廣福建山東四川等省皆銷數甚短課項日絀非大加整頓不可又奏言北省近畿各處漸多藐視官長倚恃團衆抗糧拒捕其故由於州縣不得其人平日臨財貪墨辦事武健爲民深仇疾視甚至賞罰不信告令不遵挾制官長而爲官長者

遂不敢與之相較矣疏入諭曰我國家深仁厚澤淪洽民心見在山東河南等省州縣遭賊蹂躪及閒遭荒歉地方疊經降旨分別蠲恤其完善地方亦均能爭先輸納如該大學士所奏情形總由官吏不肖有激而成誠堪痛恨著各該督撫秉公遴選潔己愛民之員俾膺民社如有貪聲劣蹟立予嚴參重懲毋稍徇隱同治元年閏八月管理刑部事務十二月充文淵閣領閣事四年五月教習庶吉士九月以承辦定陵工程事竣賞戴花翎仍交部優敘五年充大考翰詹閱卷大臣時文宗顯皇帝實錄聖訓告成賞給祖培子文龠員外郎用文令舉人一體會試祖培自道光二十四年以來歷充會試覆試閱卷大臣六次鄉試覆試閱卷大臣殿試讀卷官朝考閱卷大臣各三次六年卒諭曰大學士周祖培持躬恪慎學問優長由翰林洊擢正卿疊司文柄受三朝知遇之隆簡任綸扉管理各部均能無忝厥職朕御極以來念其宣力彌勤深加倚畀前以微疴賞假數月方冀調理就痊遐齡永享遽聞溘逝軫惜殊深著賞給陀羅經被派睿親王德長帶領侍衛十員前往奠醊加恩照大學士例賜卹任內一切處分悉予開復伊子舉人周文令著以主事用伊長孫候選主事周德祿著賞給舉人准其一體會試用示眷念耆臣

至意尋賜祭葬予諡文勤

倭仁

倭仁烏齊格里氏蒙古正紅旗人河南駐防道光九年進士改翰林院庶吉士十二年散館授編修十三年二月陞詹事府右春坊右中允七月陞翰林院侍講充日講起居注官八月轉侍讀九月陞詹事府右春坊右庶子十一月轉左庶子十二月陞翰林院侍講學士十四年署文淵閣直閣事十五年三月充會試同考官閏六月轉侍讀學士八月充順天鄉試同考官十六年三月充會試同考官十七年充福建鄉試正考官十八年充文淵閣直閣事二十二年擢詹事府詹事二十四年四月稽察右翼覺羅學八月陞大理寺卿二十五年五月丁憂九月百日孝滿二十六年充考試漢御史閱卷大臣二十七年二月充各省舉人覆試閱卷大臣九月充武殿試讀卷官二十九年七月丁憂十一月百日孝滿三十年二月應詔陳言略曰行政莫先於用人用人莫先於嚴辨君子小人夫君子小人藏於心術者難知發乎事蹟者易見大抵君子訥拙小人佞巧君子澹定小人躁競君子愛惜人才小人排擠異類君子圖遠大以國家元氣爲先小人計目前以聚斂刻

薄爲務剛正不撓無所阿嚮者君子也依違兩可伺候人主喜怒以相趨避者小人也諫諍匡弼爲朝廷補闕拾遺者君子也遷就逢迎導人主彞非彞放者小人也進憂危之議悚動人主之警心者君子也動言氣數不畏天變以滋長人君之逸志者小人也公私邪正相反如此皇上天亶聰明勤學念典孰賢孰否自難逃聖明洞鑒之中第恐以一人之心思而揣摩者衆一人之耳目而混淆者多幾微莫辨情僞滋紛愛憎稍涉偏私取舍必至失當此知人則哲惟帝其難大禹所以致歎也今欲求所以知人豈有他術哉本皇上好學之心勤求不怠使聖志益明聖德益固而已宋臣程顥云古之人君必有誦訓箴諫之臣惟命老成賢儒日親便座講論道義以輔聖德又擇天下賢俊使得陪侍法從朝夕延見開陳善道講摩治體以廣聽聞我朝康熙年間熊賜履上聖祖仁皇帝疏謂大學衍義一書爲萬世有天下者之律令格例伏願延訪眞儒講求研究務盡其理於是考之以六經之文監之以歷代之蹟實體諸身默會諸衷以爲敷政出治之本若夫左右近習必端其選綴衣虎賁亦擇其人非聖之書屏而勿讀無益之事戒而不爲內而深宮燕處之間外而大庭廣衆之際微而起居言動之恆凡所以維持此身者無

不備防閑此心者無不周則君志清明君身強固矣二臣所言皆人君修養身心之要用人行政之原也天下治亂繫宰相君德成就責講筵惟君德成就而後輔弼得人輔弼得人而後天下治然則開講幄以贊宸修致治要圖莫切於此疏入上稱其辨君子小人之分言甚切直諭嗣後大小臣工有所見聞剴切直陳宜以倭仁爲法三月禮部侍郎曾國藩奏陳用人三策上復憶倭仁言手諭同褒嘉焉十一月賞副都統銜充葉爾羌幫辦大臣時大理寺少卿田雨公以倭仁用違其才奏陳用人宜慎諭曰倭仁以三品卿給予副都統職銜爲葉爾羌幫辦大臣邊疆要任令其敷歷諳練並非投閒置散而該少卿以爲用違其才若如所奏則外任皆爲左遷而新疆換班者尤爲擯斥豈識國家文武兼資內外並重之微意乎咸豐二年五月疏言我皇上踐祚以來敬以飭躬寬以御衆求賢納諫勤政愛民聖德咸孚固宜治臻美備矣乃中外之玩愒如故人才之委靡依然寰海望治之心猶未能暢然滿志者何哉或曰積重難返也輔弼乏人也固也而非本原之論也志不期於遠大政以苟且而自安意不極於肫誠事以虛浮而鮮效則欲濟當今之極弊而轉移一世之人心亦在朝廷而已矣願皇上立必爲堯舜之志始於

思辨於學發端甚微而爲效固甚鉅也皇上端居淵默之時深察密省事事與唐虞互證危微辨歟執中允歟知人哲安民惠歟必有欲然不自足而皇然不自安者由是因愧生奮因奮生厲必期如放勳重華而後已君志既定然後擇同德之臣講求治道切劘身心由窮理修身以至於治平天下此其機操之聖心而有餘卽推之四海而無不足所謂志定而天下之治成也承艱鉅之任值多事之秋使非困心衡慮以激發大有爲之氣其何以宏濟艱難哉後世人君往往恥聞己過臣下唯諾成風吁咈都俞不可復覩以唐太宗從諫如轉圜猶積怒於魏徵蓋克己之難也舜命禹曰予違汝弼汝毋面從夫舜豈尙有違道之舉禹亦何至如讒諂面諛者流顧兢兢焉惟恐有違且恐禹面從者誠以人心至危修省密故惕厲深而求助於臣工者益切於是禹以傲戒益以怠荒戒臯陶以逸欲戒惟朝廷樂聞直諫故羣僚咸進讜言不然羣臣方緘口之不遑亦孰肯以不入耳之言干雷霆之怒哉伏讀高宗純皇帝諭旨爾九卿中能責難於君者何人陳善閉邪者何事高宗純皇帝之心卽虞帝取人爲善之心也皇上以法祖德者法堯舜則智亦大矣理財爲今日急務節用尤理財要圖前禮部議覆通政使羅惇衍崇儉禁奢

一摺刊刻簡明禮儀頒示遵行奉旨允准誠正德厚生之本計也抑更有進者政貴實不貴文民從好不從令以文告之虛辭輓奢華之積習科條雖設誰其聽之伏願皇上以身作則力行儉約爲天下先申諭廷臣將一歲度支出入之數通盤籌畫自宮府內外大小衙門凡可裁者概行裁省勿狃虛文勿沿故套勿避嫌怨勿畏繁難務量入以爲出勿因出而輕入服色器用旣已明示限制必須全行禁止有犯必懲使朝野臣民共曉然於恐懼修身以實不以文之意天下有不率從者哉至若人情嗜利廉恥道喪宜杜言利之門獎潔清之士若夫無人之患更甚於無財尤宜講明正學興賢育德以儲楨榦此皆政教大端所當及時修舉者惟聖志明斷不疑斯庶績可次第而理奏入諭曰倭仁奏敬陳治本一摺意在責難陳善其言尙無不合惟朕特授倭仁爲葉爾羌幫辦大臣原使其敷歷邊疆俾資練習今觀所奏仍係統論治道並未及邊陲情形豈忽近圖遠轉以職守爲無關輕重耶嗣後總宜留心邊務實力講求於任內應辦事件毋稍疏忽如有地方要務切實敷陳朕亦可念其學識毋得徒託空言致負委任十二月候補道何桂珍上言時勢危難請特用緩急可倚之人以固人心而維邦本倭仁秉性忠貞見理

明決處危疑而不懼臨利害而不搖生平言行一一不負所學若投以艱鉅必能盡言竭力死生以之上未從其請三年劾葉爾羌回部郡王阿奇木伯克愛瑪特於所屬護衛阿渾挾勢婪贓毫無覺察又以該管之參贊幫辦大臣倡認攤派路費畏罪情急列款訐控上以倭仁等風聞該伯克攤派路費及護衛索贓等情並未查訊明確卽行參奏辦理失當下部嚴議降三級調用四年正月京師舉行團練戶部右侍郎王茂蔭等奏請令倭仁會同籌辦上以軍務非倭仁所長寢其議二月命以翰林院侍講候補在上書房行走八月授惇郡王讀五年二月補侍講九月陞侍講學士六年二月遷光祿寺卿八月擢盛京禮部侍郎管理宗室覺羅學事務十月管理威遠堡六邊門事務十一月監收盛京官倉穀石七年二月協理內務府大臣事務八月署奉天府尹充盛京牛馬稅監督十一月調盛京戶部侍郎兼管奉天府府尹事務八年二月以署遼陽州知州覺羅景灝臨差規避奏請下部議處戶部員外郎覺羅溥節派赴吏部領取則例一年未回奏褫其職九月請將獲盜之承德縣知縣奎壽送部引見十一月奏參岫巖廳通判召隆阿廣寧縣知縣博通遲鈍竭蹶降補有差九年三月奏盜犯王超才白晝肆搶例應絞

候惟奉天根本重地見當整頓捕務應從重擬絞立決以昭炯戒四月奏錦縣三義廟地方有騎馬賊搶去摺差銀錢衣物將署知縣張廣摘頂勒緝均從之旋參副都統增慶隨帶多員騷擾驛站命將軍玉明等查辦增慶下部議處又查辦驛丞陳五福等京控牽涉兵部侍郎訥爾濟係屬兒女姻親應請迴避得旨毋庸迴避九月偕玉明奏究出訥爾濟及前任盛京兵部侍郎富呢雅杭阿等收受陋規解任革職有差十年三月偕玉明等倡捐米石下部議敘八月署盛京副都統十月補鑲白旗蒙古都統十一年二月命偕玉明承修福陵昭陵各工十月穆宗毅皇帝御極頒詔中外命充朝鮮正使諭俟頒詔事竣迅卽來京聽候簡用尋陞都察院左都御史同治元年正月擢工部尙書二月賜紫禁城騎馬奉兩宮皇太后懿旨前因皇帝沖齡亟宜典學茲復特簡工部尙書倭仁老成端謹學問優長堪膺師傅之任著授皇帝讀尋充翰林院掌院學士倭仁將前所輯古帝王事蹟及古今臣工奏議有裨治道者重加精擇附以按辭爲兩帙進呈得旨賜名啟心金鑑並陳設弘德殿以資講肄三月充會試正考官五月充教習庶吉士六月命覆閱各直省拔貢覆試卷七月以工部尙書協辦大學士八月文宗顯皇帝暨孝德

顯皇后梓宮奉移山陵上擬奉兩宮皇太后躬親遠送倭仁與諸王大臣等援引古禮籲懇停止遠行詔勉如所請時豫省官民情形日蹙倭仁臚陳入告略曰河南自咸豐三年以後粵捻各匪焚掠殆徧蓋藏一空爲州縣者賊來則倉皇束手賊去則泄沓自如積習相沿誅求無厭至稍稱完善之區則錢漕之浮收日增雜派之訛索愈甚捐輸不已雖數十畝之地戶皆勒之抽釐不已雖百餘千之本錢亦及之書役乾沒劣紳侵蝕名爲軍餉實爲中飽官慮民團聚衆相抗拒抑之於平日及被賊擾害官不能衛民民乃自行團練官亦無可如何其間良莠不齊或恃衆滋事則罪盡歸之民誅之而不問官之失故州縣官以民爲魚肉以上官爲護符上下相蒙侵漁無已哀哀小民何以堪此其不變而爲盜賊幾希矣竊謂朝廷不能盡擇州縣而必須慎擇督撫大吏嘉慶間姚祖同爲河南巡撫盡裁陋規絲毫不取每出則自備麪餅供應全無州縣貪劣者參劾不貸司道以下皆爲歛戢民間思慕至今誠擇如姚祖同者以爲巡撫革除苞苴無取於屬員則屬員無可挾以爲恣睢之計由是黜陟必當查察必嚴錢漕之浮收去其太甚雜派之繁苛澈底一清果有忠君愛國之真心必有調劑中和之善術孔子言道國之

要曰節用而愛人使民以時孟子告齊梁之君曰行仁政薄稅歛聖賢豈故爲此迂論哉良以此爲根本之計切要之圖足以撥亂而反正外此補苴張皇總屬苟且顧目前而忘遠慮務小利而釀大害如大學所謂以利爲利菑害並至者不可不深思也顧河南今日官場之錮習祇曰民刁詐不曰官貪庸祇狃於愚民之抗官而不思民所以抗官與官所以致抗之由牽聯膠固牢不可破惟在朝廷認定本計認真釐剔嚴飭撫臣實力振刷絕瞻徇迴護之私因循含混之弊州縣之清廉愛民能去雜派減浮收者破格優賞否則立予嚴罰大吏察州縣朝廷察大吏實力實心各輓積習勿虛應故事勿徒行文告庶幾民困可蘇民心自固寇亂之源由是可弭矣閏八月擢大學士管理戶部事務旋授文淵閣大學士九月充武會試監射大臣文宗顯皇帝暨孝德顯皇后梓宮奉移山陵饗殿禮成倭仁以恭理喪儀加二級十月充武鄉試監射大臣時御史裘德俊有體察牧令之奏倭仁因奏言州縣之貪廉視督撫爲轉移今吏治日壞非大吏實心愛民潔己率屬無以輓積習而奠民生新授廣東巡撫黃贊湯性情浮靡操守平常前任奉天學政聲名狼籍此次入覲來京攜帶厚資廣行餽送其居官可知其用意更可知矣夫

朝廷用人不拘一格才如可任自不妨舍短取長惟以貪鄙之行奢侈之性而濟之以巧詐之心則其所謂才不過欺飾彌縫而已而謂其有幹濟之略恐不能也廣東較他省稍爲完善京師賴以接濟安民察吏理財均關緊要以黃贊湯爲之未見其可得旨解贊湯任十二月充經筵講官二年四月充殿試讀卷官朝考閱卷大臣五月充考試滿御史閱卷大臣六月大軍克復江寧紅旗奏捷上以倭仁在弘德殿授讀加一級紀錄二次八月充崇文門正監督四年四月充朝考閱卷大臣八月充考試國子監助教閱卷大臣九月充武會試監射大臣旋署鑲白旗漢軍都統五年六月充稽察壇廟大臣九月充玉牒館督催總裁考試漢御史閱卷大臣六年正月同文館招考天文算學由滿漢正途出身之五品以下京外各官考試錄取延聘西人在館教習二月倭仁奏言立國之道尙禮義不尙權謀根本之圖在人心不在技藝今求諸一藝之末又奉西人爲師無論所學未必果精即使教者誠教學者誠學其所成就不過術數之士未聞有恃術數而能起衰振靡者也且天下之大何患無才如以天文算法必須講習博采旁求必有能精其法者何必師事西人乎自耶穌之教盛行無識愚民半爲所惑所恃讀書明理之

儒或可維持人心今復舉聰明雋秀國家所培養而儲以有用者使之奉西人爲師恐所習未必能精而讀書人已爲所惑夫數爲六藝之一本爲儒者所當知非歧途可比然天文算學爲益甚微西人教習正途所損甚大伏望宸衷獨斷立罷前議以維大局而彌隱患上以倭仁奏天文算學博采旁求必有精其術者命酌保數員另行擇地設館由倭仁督飭講求尋奏意中並無其人不致妄保復諭曰倭仁見在旣無堪保之人仍著隨時留心一俟諮訪有人卽行保奏設館教習以收實效旋命倭仁在總理各國事務衙門行走倭仁懇請收回成命上不允尋上疏固辭諭曰前派大學士倭仁在總理各國事務衙門行走旋據該大學士奏懇請收回成命復令軍機大臣傳旨毋許固辭本日復據倭仁奏素性迂拘恐致貽誤仍請毋庸在總理各國事務衙門行走等語總理各國事務衙門公務關繫緊要倭仁身爲大臣當此時事多艱正宜竭心盡力以副委任豈可稍事推諉倭仁所奏著毋庸議四月因病請假一月五月奏病難速愈請開缺調理得旨再賞假一個月毋庸開缺六月復請開缺諭曰倭仁不必給假一俟氣體可支卽以大學士在弘德殿行走其餘一切差使均著勿庸管理七月病痊十二月充文淵閣領

閣事七年六月充國史館總裁八年三月奏大婚典禮宜崇儉以光聖德略曰宮廷係四表觀瞻節儉始於躬行斯風化及於海內上行下效理固然也昔漢文帝身衣弋絺罷露臺以惜中人之產用致兆民富庶天下乂安明帝馬后服大練之衣史冊傳爲美談此前古事之可徵者也我朝崇尚質樸列聖相承無不以勤儉爲訓伏讀世宗憲皇帝聖訓朕素不喜華靡一切器具皆以適用爲貴此朕撙節愛惜之心數十年如一日者人情喜新好異無所底止豈可導使爲之而不防其漸乎宣宗成皇帝御製慎德堂記亦諄諄以不作無益害有益示戒聖訓昭垂允足爲法萬世近聞內務府每年費用逐漸加增去歲借部款至百餘萬兩國家經費有常宮廷之用多則軍國之用少況內府金錢皆閭閻膏血任取求之便踵事增華而小民徵比箠敲之苦上不得而見也咨嗟愁歎之聲上不得而聞也念及此而痾瘵在抱必有惻然難安者矣方今庫款支絀雲貴陝甘回氛猶熾直隸山東河南浙江等省髮捻雖平民氣未復八旗兵餉折減衣食不充此正焦心勞思之時非豐亨豫大之日也大婚典禮繁重應備之處甚多恐邪佞小人欲圖中飽必有以鋪張體面之說進者所宜深察而嚴斥之也夫制節謹度遵祖訓卽以檢

皇躬崇儉去奢惜民財卽以培國脈應請飭下總管內務府大臣於備用之物力爲撙節可省則省可裁則裁總以時事艱危爲念無以粉飾靡麗爲工則聖德昭而天下實受其福矣六月武英殿不戒於火倭仁偕弘德殿行走翰林院侍讀學士徐桐國子監祭酒翁同龢奏請勤修聖德以弭災變略曰伏思武英殿爲收藏欽定諸書之所列朝聖訓於此刊刻深嚴重地規制崇閎一旦煨燼實爲異常災變謹按魏青龍中崇華殿災高堂隆對以爲人君苟飾宮室不知百姓空竭故火從高起宋天聖中玉清昭應宮災蘇舜欽上疏亦以此爲言自古占驗之書凡遇宮禁火災皆以臺榭宮室爲誠今者隴西未靖民困未蘇黃河甫經合龍北河又復漫決八旗生計日蹙部款帑項不支此誠民窮財盡之時也比年以來土木之工未盡止息天安神武門樓均加修飾宮廷之內屢有興作災變之來未必不由於此自今以後皇上正宜刻勵修身躬行節儉一切大小工程概行停止傳辦之物並予罷除並請敕諭廷臣直言政事得失庶災變可弭四方蒙福奏入上嘉納之九年八月充順天鄉試正考官九月管理國子監事務十年二月因病請假旋奏請開缺調理得旨賞假兩箇月安心調理毋庸開缺三月授文華殿大學士四

月以病久未愈仍奏請開缺得旨再賞假兩箇月並賞給濼枝以資調理尋卒遺疏入諭曰大學士倭仁學術純正志慮忠誠受先朝知遇之隆由翰林洊擢卿貳特恩命直上書房旋授盛京侍郎均能恪恭盡職朕御極之初蒙兩宮皇太后簡用者碩擢任正卿旋晉綸扉並命在弘德殿授讀朝夕納誨於茲十年深資啓沃前因患病屢請開缺疊經賞假並賞給人濼以資調攝遽聞溘逝悼惜殊深披覽遺章於修齊治平之道數陳剴切語不及私閱之尤深悽愴著賞給陀羅經被派貝勒奕劻帶領侍衛十員卽日前往奠醑加恩晉贈太保照大學士例賜卹入祀賢良祠任內一切處分悉予開復應得卹典該衙門察例具奏伊子廣東候補同知福綸著俟服闋後以同知留於該省卽補理藩院員外郎福裕著俟服闋後以該衙門郎中補用伊孫戶部候補員外郎衡峻著以本部員外郎卽補衡瑞著賞給舉人准其一體會試衡齡著賞給主事衡珊衡琪均著賞給內閣中書用示篤念耆臣至意尋賜祭葬予諡文端光緒八年河南巡撫李鶴年以倭仁品學純粹德業懋昭請於河南省城特建專祠由地方官春秋致祭以彰盛軌而順輿情允之子福咸拔貢江蘇鹽法道咸豐十年殉難贈太僕寺卿銜賞騎都尉世職福綸

蔭生知府銜廣東同知福裕蔭生前奉天府府尹孫衡峻襲騎都尉戶部員外郎
衡瑞進士戶部主事

瑞常

瑞常石爾德特氏蒙古鑲紅旗人杭州駐防道光十二年進士改翰林院庶吉士
十三年四月散館授編修七月大考二等賞文綺八月擢侍講充日講起居注官
十月轉侍讀十一月擢詹事府右春坊右庶子十二月轉左庶子十七年四月擢
翰林院侍講學士十八年奏請開缺回籍省親十九年回京二十年三月補原官
四月仍充日講起居注官十一月轉侍讀學士二十三年八月充順天鄉試同考
官十二月擢詹事府少詹事充文淵閣直閣事二十四年正月稽察右翼覺羅學
三月擢光祿寺卿五月充福建鄉試正考官尋擢內閣學士兼禮部侍郎銜二十
五年正月充會試知貢舉二月擢兵部右侍郎五月以候補主事恩麟收受書吏
年終陋規瑞常坐失察降三級留任九月授鑲紅旗漢軍副都統十一月管理新
舊營房二十六年五月丁父憂八月百日孝滿十二月承襲恩騎尉旋丁母憂二
十七年四月百日孝滿五月管理圓明園八旗包衣三旗官兵二十八年二月充

稽察七倉大臣三月署鑲藍旗護軍統領十月充武英殿總裁二十九年正月署正黃旗護軍統領尋轉左侍郎二月充右翼監督四月調正藍旗滿洲副都統閏四月署戶部右侍郎兼管錢法堂事務七月充山東鄉試正考官十月充冊封朝鮮正使三十年二月署刑部左侍郎尋充實錄館副總裁三月調吏部左侍郎授右翼總兵五月稽察會同四譯館七月轉左翼總兵充教習庶吉士授正白旗護軍統領咸豐元年正月署正黃旗蒙古副都統正黃旗護軍統領三月署國史館副總裁四月署正黃旗蒙古都統充十五善射賞戴花翎六月充江南鄉試正考官會徐州豐北三堡黃流漫溢口門塌寬百餘丈河道總督楊以增奏聞命瑞常於回京時道出徐州馳往該處查勘嗣奏言查三堡池上地隸碭山而碭邑被淹之處不多三堡之北皆係沛境其縣境西南漢五中等二里黃水經由被淹最重漢二中等二十三里河水漫延被淹次重縣境東北之四一等三里中隔昭陽湖湖水頂托逐漸漫注被淹較輕豐縣在大溜西北黃水續長時縣境之南華山艾村大烏留順等四里田禾廬舍均被漫淹情形較重復因昭陽微山等湖倒漾致莘村等九里亦逐漸被淹受害尙輕至銅山縣境黃河北岸被淹無多情形又屬

次之邳州爲下游宣洩經由之所聞有波及者村莊並無妨礙又查豐北漫口時被災各縣經兩江總督河道總督等捐廉放賑查明戶口派員親自散給不假胥役之手籌辦尙屬得法又查徐屬民情强悍時有搶匪出沒災民難保不爲煽動經兩江總督嚴飭各員弁帶兵巡緝如有匪徒搶奪立即懲辦地方尙無他慮又漕船回空因本年大雨過多湖水不消各牐壩皆已啟放加以河注昭陽微山等湖隄牐漫溢幸河水入湖皆成清水運道不致受淤回空漕船可無阻滯奏入報聞九月差竣回京署正白旗滿洲副都統十一月步軍統領衙門主事缺出定郡王載銓將二等司員題陞瑞常以越次陞補顯違定例力爭之載銓將一等奏撤以二等用瑞常尋開左翼總兵缺二年充會試知貢舉三年以捐備軍餉下部優敘五年署鑲黃旗護軍統領七年八月授都察院左都御史十一月賜紫禁城騎馬八年二月署正紅旗蒙古都統四月署禮部尙書五月署正白旗滿洲都統七月充經筵講官八月命查辦順天鄉試事奏言大宛二縣辦理鄉闈供給發價折扣有需索抑勒情弊大興縣知縣賀廷鑾宛平縣知縣毛慶麟請照例議處從之九月授理藩院尙書十月署步軍統領正藍旗漢軍都統十二月授鑲白旗蒙古

都統尋擢刑部尙書九年四月署鑲藍旗滿洲都統充殿試讀卷官八月充順天鄉試副考官十年正月以山東省秋審孟傳冉一案覆覈減等錯誤降一級留任尋以刑部京察保送不實部議降二級調用得旨改爲留任先是工部寶源局監督張仁政侵蝕局款畏罪自縊上以職官輕生案關局務恐有別情命瑞常偕戶部尙書沈兆霖秉公查辦至是奏言前任監督奎麟得贓屬實又嘉興府知府前任監督瑞琇於歸案嚴訊後供稱在監督任內因試鑄鐵錢招商買炭私受商人錢文二萬二千三百餘實屬目無法紀均擬斬監候勒限一年追贓贓完後遣戍從之閏三月署鑲黃旗滿洲都統四月充殿試讀卷官五月充教習庶吉士九月管理戶部三庫事務十月以安定門一帶城垣被匪拆毀奏參疏防之營員並自請議處時駕幸熱河諭留京辦事十一月以督辦巡防下部議敘十一年七月充崇文門正監督九月調工部尙書步軍統領十月調戶部尙書正藍旗滿洲都統同治元年正月會議御史瑞亨請修復堆撥柵欄並五城稽察事奏言該御史稱五城地面五城御史亦有巡視之責應如所奏各按界址與步軍統領衙門表裏稽察儻翼尉等及各地方官有瞻徇疏縱情弊卽行嚴參至京城八旗地面堆撥

共七百七十三座柵欄計一千一百四道場壞不少擬將殘缺堆撥先飭兩翼翼尉察看情形輕者責令各該地方官趕緊修補重者先行支搭窩鋪俾兵丁得所棲止其損壞柵欄及坍塌較重之堆撥若概行修復爲費甚鉅自當擇要而圖惟見在籌款支絀該御史所奏正藍旗滿洲都統衙門前存捐修溝渠之項計官號票二萬餘串此項錢鈔雖已壅滯不宜市廛如照戶部奏定章程分交各該官號商人酌予限期或銀或錢趕緊呈繳亦足資興工而濟實用上允其議尋諭勸修礮車工程二月奏陳下夜緝盜章程請將步軍統領衙門新舊兵丁暫停派往堆撥責成管理四場章京等管帶於皇城內外八旗地面輪班下夜認真巡邏遇有劫盜格殺勿論如居民不安本分亦卽拏究其外城及城外集鎮並責成巡捕五營將弁各按所管地面會同本汛團防嚴密防緝從之尋調吏部尙書先是河南巡撫鄭元善奏自賊中投誠歷保參將之宋景詩隨欽差大臣兵部左侍郎勝保剿賊失利輒敢不候軍令率衆遁逃得旨褫宋景詩職勝保下部議處四月瑞常等議奏勝保於宋景詩前在山東投誠時疊諭妥爲辦理乃不察情僞力主撫議迨宋景詩離營遁逃時閱兩旬復不卽行奏報應照官員徇隱例降二級調用保

派往軍營之員准帶所降之級仍留軍營效力暫免開缺從之七月管理宗人府銀庫八月充順天鄉試副考官九月御史裘德俊奏商賈人等祇准捐虛銜雜職不准報捐正印下部妥議瑞常等議奏近來捐例頻開流品愈雜難保無商民市僧濫廁其間惟商民報捐例所不禁儻有通達事情留心時務者願入仕途亦未便阻其上進但文員正印官職於民生國計關係甚鉅不得不益加慎重應如該御史所奏凡商賈祇准捐納虛銜頂帶並州同以下佐貳雜職以示限制如官聲尙好有著勞績者仍准以正印陞用至此外世系本出商籍並殷實之戶開設典鋪本身並未充商者出結官應示區別不得概稱商賈以免牽混之弊奏入允行尋署工部尙書十月以吏部尙書協辦大學士旋命稽察欽奉上諭事件處十二月充管理十五善射大臣稽察官三倉大臣八旗值年大臣二年四月充殿試讀卷官七月充教習庶吉士時呼倫貝爾總管員缺諭值年旗揀選應陞之員帶領引見瑞常將應放總管人員開列請簡與旨未協下部議處十二月以失察內閣撰頒外藩清字敕書謄寫錯誤議處三年二月管理左翼幼官學四月奏杭州殉難之駐防官兵暨民間婦孺請給旌卹得旨協領隆鏗等百九十二名均照例賜

卹瑞常胞弟驍騎校瑞成胞姪喜格壽格等一併旌卹尋充盤查戶部三庫大臣先是上命南書房上書房諸臣採擇前史事蹟纂輯成書以昭法戒至是書成賜名治平寶鑑並命瑞常等輪流進講七月署鑲黃旗滿洲都統八月充順天鄉試正考官十月署鑲紅旗滿洲都統四年三月授總管內務府大臣時廷臣有以陝西布政使林壽圖政務廢弛沈湎於酒巡撫劉蓉聽信該司之言以致舉劾不公等款入告者復有劾劉蓉於蔡壽祺一案迴奏摺內申明胡林翼密保之詞忘漏洩之罪上命瑞常偕戶部尙書羅惇衍馳往查辦八月偕羅惇衍奏言查林壽圖於陝西善後事宜均隨時飭屬籌辦亦無沈湎實據其參劾各員或由劉蓉特參或經藩臬會詳亦非盡出該司一人私意惟林壽圖於會館酬神演戲邀同鄉各官宴會實屬不知遠嫌於通判松齡到任日期不遵部限知縣謝輔纓張皇賊勢虛報勇數僅予撤任亦未允協劉蓉於面訊時自知前奏措詞失當俯首引咎其漏洩密保之詞係胡林翼鈔給閱看見雖將原信呈出究屬冒昧請將劉蓉林壽圖均下部議處允之是月差竣回京旋充閱兵大臣補內大臣十月定陵奉安禮成瑞常敬題神主賞加太子少保銜五年二月調工部尙書三月兼署刑部尙書

九月充玉牒館副總裁十一月管理戶部三庫事務六年二月命瑞常偕倉場侍郎宋晉馳赴天津驗收漕糧五月奏言直隸各州縣失修殘缺剝船九十餘隻應照數賠補以備由津運通之用嗣經倉場侍郎飭備民船抵補本係通融辦理乃本年各州縣於應交剝船報解寥寥甚至有一船未解者殊屬玩視請從嚴懲辦得旨允行六月以驗收海運漕糧完竣下部優敘尋充翰林院掌院學士八月充順天鄉試副考官十一月命盤查北新倉查出各廩虧短稗粟米黑豆六萬六千四百餘石請將該倉書吏花戶人等移送刑部嚴訊從之七年閏四月充教習庶吉士六月調刑部尙書九年八月充順天鄉試副考官十年二月充管理戶部三庫大臣三月授文淵閣大學士命管理刑部事務七月授文華殿大學士十二月充文淵閣領閣事十一年卒遺疏入諭曰大學士瑞常植品端方老成練達受先朝知遇之隆由翰林洊陟正卿屢司文柄朕御極以來擢晉綸扉並總管內務府大臣兼理部旗事務宣力有年勤勞懋著前以微疴給假調理方冀即日就痊長資倚畀茲聞溘逝悼惜殊深著賞給陀羅經被派孚郡王帶領侍衛十員前往奠醊加恩晉贈太保照大學士例賜卹入祀賢良祠任內一切處分悉予開復應

得卹典該衙門察例具奏伊子禮部員外郎文暉著俟服闋後以該衙門郎中卽補用示篤念耆臣至意尋賜祭葬予諡文端子文暉盛京禮部侍郎

朱鳳標

朱鳳標浙江蕭山人道光十二年一甲二名進士授翰林院編修十四年丁母憂十七年二月服闋七月充山東鄉試副考官十九年二月大考二等賜文綺五月命在上書房行走十二月提督湖北學政二十一年六月擢國子監司業八月命仍留學政任十二月陞翰林院侍講二十三年遷詹事府右春坊右庶子二十四年二月回京命仍在上書房行走四月充日講起居注官六月陞翰林院侍講學士七月轉侍讀學士二十五年三月命授七阿哥讀四月擢內閣學士兼禮部侍郎銜五月稽察中書科事務二十六年正月充文淵閣直閣事八月署戶部右侍郎兼管錢法堂事務二十七年三月充會試副考官尋授兵部右侍郎仍兼署戶部右侍郎五月調戶部右侍郎兼管錢法堂事務十月倉場侍郎德誠奏見放商米與樣不符特敕鳳標前往查驗二十八年正月命赴天津驗收海運漕糧五月遵查撥船虧短米石奏稱訊無經紀串通情事惟承運不慎應責令經紀撥船分

別賠補其虧短至六石以上者除按數追賠外仍枷示河干以示懲儆又奏言撥船由津運通數日之中輒敢虧短米石多寡不等積弊已可概見儻不嚴行防範則乾潔必藉口於收縮足數又不免使水攙雜弊端實爲難除嗣後請著倉場侍郎於撥船起卸米石稍有折耗卽責令分賠若每船短至四石以上並查有潮溼攙雜等弊卽將船戶交刑部懲辦咨行天津道迅速賠補詔如所請七月海運事竣以督辦周妥下部議敘十一月命偕大學士耆英前往山東查辦鹽務尋以吏部右侍郎福濟詹事府右庶子駱秉章奏山東各任巡撫運使有收受面封及程儀節壽禮之事上命鳳標偕耆英確查具奏十二月查明覆奏將收受銀兩各員開單以呈諭曰山東省面封公費銀兩向係商捐商用據查明歷任支銷之處實係藉資辦公所有歷任巡撫運使支銷公費著毋庸議惟程儀節壽著永遠革除不准仍蹈錮習其收受各員本應一概懲辦姑念相沿已久且係在面封項下支銷與需索有閒此次暫行從寬分別辦理所有收受程儀之前任巡撫署巡撫均交部議處收受節壽各項之前任運使均交部嚴加議處所受銀兩照數罰賠又奏查出歷任運使出借銀兩七萬三千九百兩有奇雖事屬因公確有案據惟自

道光二十年後迄未歸款歷任相沿流弊滋甚請責成各任運使如數賠繳又奏山東藩庫實存款內歷年積存減平並軍需二成三成及扣還行裝等款共銀三十萬兩向不歸入奏銷請撥解部庫均如所請又奏清查山東濟南府屬十六州縣倉庫所有正雜各項未完銀四十一萬四千七百餘兩各倉缺穀三十七萬三千八百餘石諭曰抽查一府如此各府可知累月經年因循拖欠州縣則私肥囊橐上司乃漫不經心徐澤醇劉源灝卽將所奏情形遵照前旨依限八個月趕緊清釐其中款目繁多認真稽覈務將虧短各項迅速設法彌補飭令撥解又奏參候補知府周瑞圖在德州知州任內欠交地丁錢糧一萬餘兩請旨褫職勒限催繳二十九年正月奏言山東鹽政疲敝甚於他省如綱總之易滋盤踞浮費之貽誤正供積引之以舊混新商名之以此冒彼或聽其懸引而稅課幾致虛懸或任其漏私而緝捕竟爲故事若望其裕課暢銷惟除弊緝私最爲先務尋會同籌議變通章程請先課後鹽以重帑項下部議行七月以本籍災歉捐銀備賑下部優敘八月充教習庶吉士三十年五月遵議稽覈戶工兩局匠役章程開單呈覽又奏卯錢能否如式責成大使請定獎劾章程允行六月轉左侍郎兼管三庫事務

並兼署吏部右侍郎十月充實錄館副總裁十二月充經筵講官咸豐元年五月遷都察院右都御史九月署工部尚書十月賜紫禁城騎馬二年正月充國史館副總裁三月署刑部尚書八月充順天鄉試副考官三年三月署戶部尚書並管理三庫事務時髮逆陷揚州總督楊殿邦退保淮安上允廷臣所議命將軍督撫選精兵分路會擊並調山西陝甘兵七千馳赴山東江南交界以備調遣鳳標在部與尚書文慶守郎全慶王慶雲會商奏言淮安賊所必爭布置萬難再緩非特派重臣選帶勁旅迅速迎擊萬一賊渡河則江南山東一帶民情震動撲滅愈難見調各兵一時斷難馳到請命山東巡撫李德迅帶精兵數千親往淮安扼賊北來之衝並請敕下直隸總督迅選精兵數千交布政使張集馨在直隸山東交界扼要駐紮訓練以爲京師屏蔽疏入上命李德酌留黑龍江馬隊官兵扼要堵剿並諭直隸總督訥爾經額如所請行五月賊陷河南歸德鳳標以爲賊勢已偏汴梁開封守備空虛恐難固守待援勝保雖已引兵向西然僅能躡追賊後江忠源由湖北折回亦需時日恐賊聲東擊西由曹考蘭儀渡河蔓延直隸山東界內因與大學士賈楨尚書翁心存公擬防剿事宜六條一扼河而守最爲要務宜速令

東河總督河北鎮道分兵防遏黃河船隻盡拘北岸毋以資賊並請敕恩華統帶吉林黑龍江官兵兼程前進於兗曹一帶擇要駐紮山東巡撫河南漕運各總督分扼黃河南北兩岸以通驛路兼護糧臺其續調之山陝官兵令駐河南曹考延津北岸嚴密防堵並防奸細潛窺河隄爲偷渡灌城之計其迤西孟津諸渡一律防範至汴梁形如釜底萬難堅守宜令撫臣駐兵河干接仗較爲得勢並催勝保星夜赴援一直隸大順廣一帶宜速調重兵防守惟近京各鎮不可調撥過多致失居重馭輕之道宜於保定正定調集重兵示以鎮靜倘有蠢動亦易剿擒一河南之偃師閿鄉靈寶山西之澤潞蒲津陝西之潼商兩路均宜併力堵截杜賊西竄之路洛陽尤爲險要宜設嚴防一前調察哈爾土默特蒙古馬隊兵在察哈爾熱河分駐應否密飭整頓軍裝器械並豫撥內庫銀兩以備軍需俟一有徵調卽可飛速進口一京師九門內外堆撥宜實力巡查盤詰奸宄請敕步軍統領衙門順天府五城晝夜偵察密速擒拏以防竊發海運米石宜卽運入城內祿米等倉其通州倉儲糧石亦宜運入城內一逆賊負固金陵分踞揚州而潛向西北肆擾其計甚爲狡譎總師于者乃各擁重兵相持不決若復遷延時日師老財匱事變

將生深爲可慮請特旨嚴飭琦善剋期收復揚州和春等水師盡焚江中賊艦鄧紹良等進復鎮江然後江北之師肅清淮甸西馳擊賊江南之師合剿金陵埽穴擒渠餘賊自易殄滅尤須密飭向榮許乃釗等布置周密毋墮奸計俾竄出重圍又蹈永安道州覆轍疏上上嘉納採擇施行九月充武會試正考官時竄賊倡畿疆鳳標偕賈楨翁心存奏請豫籌守城事宜尋遵旨奏擬章程六條一遴人才以專責成一分方段以清地界一查戶口以別良莠一備丁壯以相保衛一製器械以習技藝一除奸宄以安良善並公舉總辦人員得旨報可十一月充實錄館總裁十二月以捐備軍餉下部優敘四年正月充經筵直講二月授刑部尙書五月調戶部尙書五年充武會試正考官六年六月充教習庶吉士十一月宣宗成皇帝實錄聖訓告成賞太子少保銜尋調兵部尙書八年八月充順天鄉試副考官九月署工部尙書復調戶部尙書十月以御史孟傳金奏中式舉人平齡硃墨不符特派大臣覆勘試卷覆奏應訊辦者甚多命暫解鳳標任聽候查辦九年二月王大臣會審議結諭曰副講官戶部尙書朱鳳標於柏葑撤換試卷闈中並未查訊出場後又不卽奏參若照舊例辦理知情徇隱卽應治罪卽止於失察亦應研

訊惟閱其供詞尙無知情弊諒朱鳳標亦不敢公然徇縱著從寬卽行革職八月賞翰林院侍講學士銜仍在上書房行走授醇郡王讀十月授大理寺少卿十一月擢通政使司通政使十年五月遷都察院左副都御史署刑部右侍郎十二月擢兵部尙書十一年十月以護送文宗顯皇帝梓宮回京並追敘熱河扈從功賞加二級旋調吏部尙書賜紫禁城騎馬十一月充上書房總師傅尋充武鄉試正考官十二月署工部尙書充經筵講官同治元年五月署都察院左都御史八月充國史館副總裁二年三月署工部尙書五月充教習庶吉士三年充順天鄉試副考官四年四月署管理戶部三庫事務六月署戶部尙書六年六月以御史朱鎮奏請更定外城團練章程命偕大學士賈楨都察院左都御史汪元方妥議具奏尋奏添派大臣會同管理勇局分日到局監視抽查並責成帶勇員弁實力操防日練夜巡如有不法各情卽按軍法重懲帶勇官從嚴議處並請敕五城御史協同查察七年正月命以吏部尙書協辦大學士尋充翰林院掌院學士國史館總裁三月充會試正考官擢大學士管理吏部事務四月授體仁閣大學士閏五月諭免帶領引見十二月稽察欽奉上諭事件處充文淵閣領閣事八年六月

充武英殿總裁八月鳳標七十壽辰御書台衡介祉扁額福壽字及如意文綺等件賜之九年充管庫大臣十年充會試正考官十一年六月以病奏請開缺命以大學士致仕賞食全俸鳳標歷充殿試讀卷官六次朝考閱卷大臣五次鄉會試覆試閱卷大臣九次庶吉士散館閱卷大臣三次大考翰詹閱卷大臣考試試差閱卷大臣六次十二年卒遺疏入諭曰原任大學士朱鳳標老成端謹學問優長由翰林洊擢正卿疊司文柄朕御極後命充上書房總師傅簡任綸扉管理部務均能恪恭將事克稱厥職上年患病疊請賞假調理嗣因固請開缺准予致仕賞食全俸方冀調養就痊遐齡永享遽聞溘逝悼惜殊深加恩追贈太子太保銜賞給陀羅經被派肅親王隆勲帶領侍衛十員卽日前往奠醑任內一切處分悉予開復應得卹典該衙門察例具奏伊子朱其煊俟服闋後以工部郎中遇缺卽補伊孫監生朱有基賞給舉人一體會試尋賜祭葬予諡文端子其煊山東按察使孫有基恩賞舉人江西知府

賈楨

賈楨山東黃縣人道光六年一甲二名進士授翰林院編修八年充順天鄉試同

考官九年充會試同考官十一年充貴州鄉試正考官十三年三月充會試同考官七月大考一等擢侍講十六年入直上書房十七年二月京察一等記名以道府用六月充湖北鄉試正考官十八年閏四月命授六阿哥讀五月轉侍讀九月擢侍講學士十九年二月大考翰詹諭賈楨不必考試七月遷詹事府少詹事二十年三月擢內閣學士兼禮部侍郎銜八月充順天鄉試副考官二十一年陞工部右侍郎兼管錢法堂事務二十二年大清一統志全書告成楨前充纂修下部議敘二十三年充江南鄉試正考官二十四年調戶部右侍郎兼管錢法堂事務二十五年三月充會試副考官四月轉左侍郎管理三庫事務十二月充經筵講官二十七年三月擢都察院左都御史五月遷禮部尚書十一月賜紫禁城騎馬二十九年調吏部尚書三十年充會試副考官咸豐二年三月署翰林院掌院學士五月教習庶吉士九月命以吏部尚書協辦大學士十月以捐助餉銀交軍機處存記三年二月請命山東在籍紳士籌辦團練從之三月恭題孝和睿皇后神主禮成賞太子太保銜六月山東黃縣土匪張九仔等滋事楨以賊黨甚多夥犯未獲請飭地方協同團練嚴拏懲治如所請行十月充上書房總師傅尋兼管順

天府府尹事務四年三月海運將次抵津復命勘沽北運河上游北寺莊河隄設法捐辦尋以河隄歲事並捐修通州城址在事各員奏請獎勵有差五月充翰林院掌院學士九月順天府役滿書吏范鶴等與戶部井田科銀庫書吏營私骫法於解庫款項買鈔抵銀植察知其弊讞定奏聞失察官皆獲咎植以先行查出改爲察議十一月擢大學士管理戶部事務十二月授體仁閣大學士五年八月充順天鄉試正考官十月以孝靜康慈皇后升祔禮成賞給御用袍服十二月兼管工部事務旋晉武英殿大學士並稽察欽奉上諭事件處六年六月丁母憂諭曰大學士賈植在上書房宣力有年簡任綸扉甚屬勤慎見丁母憂著暫行開缺給假六箇月扶柩回籍並加恩賞銀四百兩經理喪事假滿卽來京當差植疏言三年之喪理宜守制臣兄弟五人自道光甲辰年後諸弟疊亡臣僅獲幸存今不能爲母守制是臣母雖有子而如無子臣又何以爲子力請終制御史鄒煥杰亦請旨准其開缺復諭曰鄒煥杰謂賈植停柩在京並無回籍之意自係傳聞之誤惟所稱君有優旨原恩厚而情深臣必固辭乃心安而理得等語持論甚正見在賈植懇恩終制業已俯如所請適與該御史所見相符至請照從前大學士張玉書

大祥後來京之處著毋庸議八年服闋回京九年二月命以大學士銜補吏部尙書充上書房總師傅三月充會試正考官五月授體仁閣大學士管理兵部事務兼翰林院掌院學士十年閏三月遵旨保奏編修李鴻藻入直上書房授穆宗毅皇帝讀五月諭曰山東在京大小官員各就地方情形仿照河南團練章程直抒所見並各舉所知候旨派往植疏擬章程八條並請以前任戶部右侍郎杜翻爲督辦山東團練大臣並編修郭夢惠主事畢翰昭候選直隸州知州趙康侯等隨同辦理從之八月新設京城內外團防局募勇緝賊命植等充團防大臣十二月充國史館總裁十一年正月晉武英殿大學士三月稽察欽奉上諭事件處六月以疾奏請開缺賞假調理七月穆宗毅皇帝御極十月偕大學士周祖培尙書沈兆霖等合疏云我朝從無皇太后垂簾聽政之典前因御史董元醇條奏特降諭旨甚晰臣等復有何異詞惟是權不可下移移則日替禮不可稍渝渝則弊生皇上冲齡踐阼欽奉先帝遺命派怡親王載垣等八人贊襄政務兩月以來用人行政皆經該王大臣擬定諭旨每日明發均用御賞同道堂圖章共見共聞內外皆相欽奉臣等詳慎思之似非久遠萬全之策不能謂日後之決無流弊也尋繹贊

襄之義乃佐助而非主持若事無鉅細皆由該王大臣先行定議是名爲佐助而實則主持日久相沿中外能無疑慮乎爲今之計正宜皇太后數宮中之德化操出治之威權使臣工有所稟承命令有所咨決不居垂簾之虛名而收聽政之實效準法前朝憲章近代不難折衷至當也伏查漢之和熹鄧皇后順烈梁皇后晉之康獻褚皇后遼之睿智蕭皇后皆以太后臨朝史冊稱美至宋之章獻劉皇后有今世任姒之稱宣仁高太后有女中堯舜之譽明穆宗皇后神宗嫡母上尊號曰仁聖皇太后穆宗貴妃神宗生母上尊號曰慈聖皇太后維時神宗十歲政事皆由兩宮決擇命大臣施行亦未嘗居垂簾之名也我皇上天亶聰明不數年即可親政而此數年來外而寇難未平內而夷人偪處何以拯時艱何以飭法紀固結人心最爲緊要儻大權無所專屬以致人心惶惑是則大可憂者請敕下廷臣會議皇太后召見臣工禮節及一切辦事章程或仍循向來軍機大臣承旨舊制或量爲變通條列具奏請旨酌定以示遵守庶行政可免流弊而中外人心益深悅服矣疏入命廷臣集議尋得旨允行旋充實錄館總裁上復以楨年已六旬嗣後毋庸帶領引見同治元年四月充教習庶吉士八月充順天鄉試正考官九月

充恭送文宗顯皇帝梓宮大臣復充覆覈朝審大臣奏言檢查官犯何桂清一起
招册內有六月初七十三等日兩次諭旨未經錄入據實奏聞時植聞安徽降賊
苗沛霖擬於月內分大隊二股一由清江一渡潁西聲言赴陝西勝保軍營助剿
並令兵士不帶鍋盔疏曰苗沛霖以一捻首大吏撫之派辦團練蒙文宗顯皇帝
擢至四川北道天恩高厚至優極渥乃苗沛霖不知感激輒因微釁糾衆稱兵
旋又窮而就撫乃復擁兵觀望反復不常今陝西軍務未平地方已遭蹂躪苗練
素無紀律儻故智復萌數千里長驅入陝何異引狼入室且軍興以來兵勇攜帶
鍋帳行糧尙恐沿途滋擾苗練乃欲不帶鍋盔是直欲攘奪民食也准徐一帶疊
被捻氛突又來一苗練民更何堪況由潁趨豫尙爲道所必經若繞道清江則去
之愈遠設或意存窺伺西犯山左則北路門戶大開固爲心腹之患抑或東犯襄
下河淮揚通海在在可虞請旨飭下勝保斷不可輕議徵調若苗沛霖決志入陝
亦請命勝保嚴行阻止並密諭吳棠譚廷襄等實力嚴防勿令苗練一人入境又
疏言皖省軍情緊要署撫臣李續宜回籍葬親請勿拘百日定制迅飭回任督辦
軍務上皆從之十一月充實錄館監修總裁二年充鄉試校射大臣三年七月以

江寧克復巨憝就擒賞加一級八月補繕宣宗成皇帝實錄黃綾本全書告成奏請優獎在館人員如所議行四年三月充會試正考官九月上謁東陵命留京辦事十二月文宗顯皇帝實錄聖訓告成上以楨監修勤勞賞戴花翎楨子山西潞安府知府致恩以道員用六年二月國史館纂辦年表奏議等書告成奏請獎敘在館人員從之四月充武英殿總裁教習庶吉士六月御史朱鎮奏請另定外城團練章程命楨等妥議具奏尋疏言查咸豐年間欽派辦理外城事務係屬四員節因事故出缺臣楨一人照料難周擬請簡派大臣一二員會同管理勇局事宜分日到局監視抽查責成帶勇員弁實力操防日練夜巡如有不法各情或卽按軍法重懲儻知而不舉卽將該勇官從嚴議處並請飭下五城御史協同查察其巡邏會哨亦應彼此聯絡以壯聲勢而資彈壓至勇局之宜分宜合官弁之或賢或否新派大臣非稽察一二月不能周知統由臣楨會同酌量情形隨時辦理庶實事求是以仰副聖主禁暴安良之至意上躡之八月充順天鄉試正考官九月楨七十壽辰御賜福壽字平格延釐額寵眷三朝承渥澤祥開七艷迓繁祺聯句並珍玩文綺等物十一月以病乞退上不許仍賞假調理尋恭繕文宗顯皇帝本

紀告成尊藏皇史宬植奏請獎敘在館人員從之七年因病請開缺命以大學士致仕賞給全俸命仍充團練大臣先後疏陳局員帶勇拏獲賊匪請予獎勵均得俞旨植自道光二十一年以來歷充大考翰詹閱卷大臣一次考試試差閱卷大臣五次庶吉士散館閱卷大臣二次殿試讀卷官四次朝考閱卷大臣三次會試覆試鄉試覆試閱卷大臣各四次考試御史閱卷大臣二次拔貢朝考閱卷大臣三次十三年卒遺疏入諭曰予告大學士賈植持躬端謹學問優長受先朝知遇之隆由翰林入直上書房洊陟正卿入贊綸扉疊司文柄朕御極後派充實錄館監修總裁優加簡畀倚任方殷旋以患病准予致仕賞食全俸方冀頤養安和長承恩眷茲聞溘逝悼惜殊深著賞給陀羅經被派載濂帶領侍衛十員卽日前往奠醑加恩晉贈太保照大學士例賜卹入祀賢良祠任內一切處分悉予開復應得卹典該衙門察例具奏靈柩回籍時沿途地方官妥爲照料伊子道員用河南彰德府知府賈致恩俟服闋後以道員遇缺卽補伊孫員外郎銜主事賈孝珍以郎中分部卽補用示篤念耆臣至意尋賜祭葬予謚文端子致恩浙江布政使孫孝珍兵部郎中

瑞麟

瑞麟葉赫那喇氏滿洲正藍旗人由文生員於道光二十一年充太常寺學習讀祝官二十五年補贊禮郎二十七年裕祭太廟禮成上以瑞麟讀祝聲音洪亮賞五品頂帶花翎二十八年陞太常寺少卿二十九年三月擢內閣學士兼禮部侍郎銜六月兼管太常寺事務十二月丁母憂三十年三月百日孝滿授禮部右侍郎五月上祀地於方澤以贊引官察杭阿於獻爵引爵錯誤瑞麟等均鐫級留任七月署正黃旗護軍統領九月宣宗成皇帝梓宮奉安禮成賞加二級咸豐元年九月授鑲藍旗滿洲副都統二年四月授正黃旗護軍統領七月調正紅旗滿洲副都統八月充經筵講官十一月兼署鑲黃旗護軍統領十二月署工部左侍郎兼管火藥同事務三年三月授左翼前鋒統領左翼監督五月管理內務府三旗烏槍營事務七月以刑部要犯劉秋貴監斃命瑞麟查訊尋鞫實覆奏郎中陳魯等坐草率降革有差八月充崇文門副監督九月調戶部右侍郎兼管錢法堂事務尋署禮部右侍郎十月命在軍機大臣上行走賜紫禁城騎馬時髮逆竄踞天津靜海縣及獨流鎮命瑞麟帶兵赴津偕參贊大臣僧格林沁等防剿十二月攻

獨流克之靜海賊懼傾巢出竄河間府之束城村四年二月陷阜城瑞麟督兵追剿賊復分竄連鎮遂陷山東之高唐州瑞麟會軍合擊屢有斬擒閏七月轉戶部左侍郎兼管三庫事務五年正月大軍進規連鎮瑞麟督兵會攻燬其木城諸軍繼之克連鎮首逆林鳳祥就擒餘賊殲焉得旨嘉獎加都統銜賞巴達琿阿巴圖魯名號二月凱旋回京三月管理健銳營事務四月官軍復高唐州髮逆全股肅清上念瑞麟功下部優敘尋授西安將軍十一月擢禮部尚書授鑲白旗蒙古都統六年十月充玉牒館副總裁十一月調鑲黃旗漢軍都統授總管內務府大臣七年正月充經筵講官三月管理欽天監事務十月管理戶部三庫事務八年三月署工部尚書四月英法軍艦駛入天津命馳赴楊村會同提督托明阿籌防守六月署直隸總督七月以通州鑄造銅礮需用銅斤請截留浙江運津洋銅九萬餘斤以濟要需從之九月調戶部尚書十月遵旨會同直隸總督慶祺議奏添設天津河口各營將弁請酌量裁移改駐疏入得旨允行十二月擢大學士兼管禮部鴻臚寺太常寺事務九年正月授正白旗領侍衛內大臣旋授文淵閣大學士稽察欽奉上諭事件處四月長蘆鹽政烏勒洪額疏言長河一帶淤墊過高河身

乾涸有妨漕運宜亟籌疏濬上命瑞麟偕戶部尙書周祖培前往履勘尋勅明覆奏如所議行是月充殿試讀卷官五月管理戶部事務七月充經筵直講十年四月充殿試讀卷官五月授內大臣六月英法軍艦復入天津京師戒嚴上命瑞麟帶兵赴通州防守七月疏言聯軍見踞唐兒沽當以嚴防陸路爲急通州爲京師東南門戶擬於城外分紮數營爲掎角之勢又偕僧格林沁奏請調蒙古三盟兵助剿並籌備京城防守機宜八月怡親王載垣等與英法兩使議和未成聯軍撲犯官軍瑞麟等禦之於八里橋光祿寺卿勝保軍擊其南瑞麟擊其東正酣戰間勝保受礮傷墜馬官軍驚潰敵西趨偪都城瑞麟請帶隊回京布置防守上不許命暫統勝保軍駐城外接應旋駐安定門外迎戰失利詔褫職九月上巡幸木蘭命瑞麟馳赴行在十月和議成賞侍郎銜並賞還花翎命赴山東與僧格林沁剿辦濟寧一帶捻匪時賊踞鉅野之羊山集瑞麟以兵攻之復失利馬蹶被傷退軍濟寧城外乞假調理僧格林沁以其節節退守不能得力疏劾之復褫職奪花翎召令回京十一年二月賞四品頂帶恭辦平安峪吉地工程尋授鑲黃旗漢軍都統兼署正白旗蒙古都統十二月管理神機營事務同治元年六月署鑲白旗漢

軍都統七月署熱河都統十月實授二年五月疏陳熱河圍場駐防旗丁練餉支絀請將圍邊荒地八千餘頃招佃開墾以濟軍實並條陳押荒升課章程奏入諭曰所籌招佃展墾自屬可行事當創始必須妥籌盡善明定界址以杜爭端六月授廣州將軍四年二月兼署兩廣總督時廣東信宜土匪勾結廣西岑溪股匪擾化州羅定等處瑞麟飭副將曾敏行等帶兵攻擊轉戰數百里毀其巢擒首逆吳春標陳日昇李阿孃等斬之並殲逆首江甲麟於化州五月髮逆汪海洋擁衆數萬由永定竄大埔瑞麟檄副將方耀等督隊扼防賊假冒官軍以圖潛襲方耀嚴陣以待偵賊將近突起奮擊連獲勝仗斬馘無算賊潰遁閩五月遣軍入閩會剿復詔安平和兩縣城餘賊復竄廣東瑞麟飭副將寶林等迎擊敗之於大溪總兵翟國彥等又追敗之於東船鄉賊大潰遁入鎮平八月花旗股匪竄平遠縣境爲官軍所敗復竄長樂縣之雉雞籠鐵場等處瑞麟檄總兵卓興移師進剿疊破之九月賊陷長樂卓興督隊圍攻賊勢窮逆首僞烈王黃宗保乞降獲僞來王陸順德斬之遂復縣城十一月洋面盜起瑞麟飭潮州府知府海廷琛等率軍剿之擒盜魁及其黨百餘名正法又飭方耀會合閩軍復鎮平縣城先是賊由平遠敗走

江西旋竄連平擾長寧翁源陷嘉應州瑞麟偕閩浙總督左宗棠等奏請合福建廣東江西三省兵力會剿疏入上命提督鮑超帶兵馳援至是方耀等會鮑超諸軍四面環攻十二月賊潛啟城門夜遁官軍越嶺追擊殲僞偕王譚體元於黃沙壩擒首逆汪海洋戮之餘匪一律蕩平五年正月瑞麟以捷聞上優詔嘉獎賞還花翎六月左宗棠疏稱粵海關徵收稅銀報數懸殊請改歸督撫經理上命瑞麟等查覈尋奏言粵海關稅前經改隸將軍督撫經理自乾隆五十年改設監督著爲成例未易輕議更張且該關額徵總數從前併歸一口不及九十萬兩近來歸五口通商每年猶及一百萬兩但能嚴禁偷漏自見起色請無庸議從之八月實授兩廣總督六年三月五坑客匪滋事瑞麟遣副將鄭紹忠等剿之疊破芋塘長坑等處踞匪進攻八寶坪克其巢時曹冲赤溪匪徒同時聚衆滋擾瑞麟商令巡撫蔣益澧督兵進剿由獅子山等處分路攻擊逆衆率黨來援官軍揮隊鈔擊直偪田頭寨環築礮臺晝夜嚴攻賊窮蹙求撫餘黨悉平上嘉獎之七月以布政使郭祥瑞濫委代理人員瑞麟先後批准下部議奪俸七年十二月兼署廣州將軍八年五月新安東莞等縣匪徒肆擾瑞麟飭鄭紹忠督兵剿平之十月疏劾前任

鹽運使方濬頤專擅並收支款目多有不符上命方濬頤速赴廣東清理如有虧短情弊卽從嚴究參九年十一月兼署廣東巡撫十年六月擢大學士仍留兩廣總督任七月授文淵閣大學士九月以潮州府屬匪徒歷年搶掠械鬪檄方耀與道員沈映鈴率兵剿捕獲匪首陳觸目等先後正法十一年六月轉文華殿大學士七月以率同司道等官倡捐直隸賑銀四萬餘兩下部優敘十月瓊州府等屬土匪滋事派署總兵劉允成督軍剿辦擒匪首何亞萬等誅之十三年八月因病乞假尋卒遺疏入諭曰大學士兩廣總督瑞麟老成端恪練達勤能受先朝知遇之隆洊陞卿貳入贊樞機咸豐二年特命赴直隸天津等處督兵剿匪克奏膚功朕御極後簡授廣州將軍調任兩廣總督在粵十年練兵訓士綏靖邊疆辦理地方事宜均臻妥協旋晉綸扉仍留總督之任敷歷中外懋著勤勞前因患病賞假調理方冀漸次就痊長承恩眷茲聞溘逝悼惜殊深著加恩追贈太保照大學士例賜卹入祀賢良祠任內一切處分悉予開復應得卹典該衙門察例具奏准其入城治喪靈柩回旗時沿途地方官妥爲照料伊子候選知府懷塔布俟服闋後以四品京堂候補主事用佛呢音布賞給員外郎花沙布哈芬布均俟百日孝滿

後由該旗帶領引見用示朕篤念耆臣至意尋賜祭葬予諡文莊子懷塔布工部尚書佛呢音布候補道哈芬布恩賞員外郎

麟魁

麟魁索綽羅氏滿洲鑲白旗人道光三年進士六年殿試二甲第一名改翰林院庶吉士九年散館改刑部主事十二年補官十三年十月陞詹事府右春坊右中允十二月轉左中允陞右庶子十四年四月充日講起居注官七月充山東鄉試副考官八月陞翰林院侍講學士十五年八月陞詹事府詹事十二月授通政使司通政使十六年陞都察院左副都御史十七年二月署刑部右侍郎四月授盛京刑部侍郎十八年閏四月命來京補刑部右侍郎兼鑲紅旗漢軍副都統八月轉左侍郎十九年二月署鑲紅旗護軍統領三月兼正紅旗副都統六月充浙江鄉試正考官二十年正月署倉場侍郎三月至五月歷充覆勘會試讀卷官庶吉士散館閱卷大臣殿試讀卷官朝考閱卷大臣七月充崇文門副監督九月命偕戶部左侍郎吳其濬前赴湖北查勘各州縣被水及該省督撫安撫情形十一月勘實奏聞先是江西省有鬧漕京控之案上命麟魁由湖北折回江西提集人證

秉公審訊又有人參奏江蘇署邳州知州賈輝山不理公事與吏目結盟並濫用非刑等款得旨著麟魁於江西審案完竣後卽馳赴該處查訪務得確情嚴參懲辦至是均訊明入奏十二月調戶部右侍郎兼管錢法堂事務二十一年五月充武英殿總裁八月調吏部左侍郎九月署禮部尙書授總管內務府大臣署左翼總兵都察院左都御史十二月偕理藩院尙書宗室恩桂奏言巡捕五營近在畿輔操防宜倍嚴密軍械尤須適用查五營原設槍兵一千名各項兵等四百八十三名盪子馬一百匹向係教習什長等教練技藝按名給予公費並給與餉食銀兩各在本營按期操演每月合操一次春秋二季閱看兩次本年秋季閱看各項技藝均屬可觀惟鳥槍一項最爲軍中利器茲槍兵僅止千名爲數較少似可量爲變通添設一千名請將原設之藤牌弓箭各兵三百八十三名裁撤改爲槍兵其不敷之數在於各營防兵內擇其年力精壯者補足以資捍禦如所請行二十二年五月署山東巡撫時英吉利船駛入鎮江海防戒嚴諭曰登州府城東北兩面環海情形最爲危險於海灘排築護城河隄添設絮被究竟能否禦之又於城後山巔埋伏馬隊精兵爲橫衝旁擊之計所有沿海安設大礮均移置近城地方

專備陸路攻守辦理尙屬周妥惟該國大船能否貼岸其桅上之礮是否可以轟至城內仍著派員測量據實具奏至該省兵力强健人心亦固著會同登州鎮總兵申明紀律激勵人心嚴密防堵又諭於兗州登州兩鎮內挑選精兵並選精良器械迅赴清江浦會同麟慶協力守禦至擡槍擡礮爲行軍要需並著飭屬多爲製造以備調用九月命赴湖南會同刑部左侍郎王植審辦事件尋翰實按律定擬十月復署禮部尙書兼鑲藍旗漢軍都統二十三年四月補禮部尙書管理太常寺鴻臚寺事務五月充考試試差閱卷大臣六月署管理欽天監事務偕禮部尙書龔守正等奏言聖裔奉祀生各省尙有定額其充補祀生請由該督撫會同學政於本省嫡裔內詳選充補造冊送部覈定給予印照有關涉衍聖公者由衍聖公會同巡撫學政辦理不得以隔省之人濫充其有事故出缺者將原領印照繳銷並請敕下衍聖公詳查各博士等有私藏之關防私給之劄付概行送部銷燬以申舊章而重名器從之八月充順天鄉試正考官九月命馳赴中牟河工會同工部尙書廖鴻荃河道總督鍾祥河南巡撫鄂順安督辦合龍一切事宜十一月賜紫禁城騎馬十二月東西兩壩成麟魁等先後奏聞得旨水深溜急正當吃

緊之際著麟魁等督飭各員將已辦新工加意守護仍即跟接進占務於迅速之中倍加慎重二十四年正月以壩工遭風屢蟄褫職留任諭曰本年節候較早轉瞬桃汛經臨辦理恐更棘手著將水勢平險若何進占能否順利約計合龍尙在何時此時所挑引河情形若何一併據實具奏二月復以壩工垂成屢蟄得旨著革職給予七品頂帶仍留工次督辦旋以所需物料購運維艱而水勢日增萬難措手奏請援案緩辦得旨並革去七品頂帶來京聽候諭旨十月賞三等侍衛充葉爾羌參贊大臣二十六年充烏里雅蘇臺參贊大臣二十七年八月授禮部右侍郎十二月充右翼監督調刑部左侍郎二十八年二月陞禮部尙書五月署正紅旗蒙古都統十月署鑲藍旗蒙古都統充翰林院掌院學士十一月復賜紫禁城騎馬十二月充經筵講官時大學士宗室耆英等遵查東商面封公費並程儀節壽名目請將收受之歷任山東巡撫運司及署任各員分別交議麟魁以前任山東巡撫得旨降三級調用三十年賞副都統銜充烏什辦事大臣咸豐元年閏八月奏言當今吏治不在紛更而在實心任事卽如廣西逆匪滋事勞師糜餉已逾數月其初不過匪徒聚衆盜賊搶劫地方官豈無見聞無如畏事偷安或且任

意包庇遂致日久蔓延養癰成患此等積習一省如此各省亦須慮及請旨敕下封疆大吏嚴查該地方如有教匪土匪聚衆以及搶劫之事務令隨時查拏毋貽後患至經費一節近開捐輸事例誠爲朝廷萬不得已之舉因思各省辦理清查已屢次矣近來何省錢糧徵數如額何省仍多積欠應請敕下部臣按時詳查覈其爲數較多即將該督撫布政司優加賞賚其道府州縣亦立予陞擢如徵解仍多積欠即將督撫布政司嚴加議處其道府州縣立予降革追交如此明示賞罰則皆知愧奮否則徒有清查之名未獲清查之效於國計經費仍無濟事至地方舉行卓異亦以各員任內徵解成數是否足額出具考語以歸覈實庶幾賦課不至任意拖欠矣奏入下所司議行九月授察哈爾副都統十月授戶部右侍郎兼管錢法堂事務二年正月補鑲黃旗漢軍副都統五月命在軍機大臣上行走七月復充經筵講官陞工部尙書八月充順天鄉試正考官十月復賜紫禁城騎馬三年四月署禮部尙書兼管太常寺鴻臚寺事務九月調禮部尙書十月授總管內務府大臣命毋庸在軍機大臣上行走五年三月署工部尙書十一月調刑部尙書兼署禮部尙書六年六月充教習庶吉士十二月管理戶部三庫事務七年

正月充崇文門副監督閏五月命往東陵查辦事件六月授正藍旗蒙古都統八月稽察右翼宗學八年三月署鑲白旗蒙古都統四月仍兼署禮部尙書五月署鑲紅旗漢軍都統七月兼署吏部尙書十二月調禮部尙書復充翰林院掌院學士授內大臣充文淵閣領閣事九年四月署管理國子監事務充會試覆試閱卷大臣殿試讀卷官朝考閱卷大臣十年三月署鑲黃旗漢軍都統五月因呈遞謝恩摺失檢議降三級調用六月補刑部右侍郎七月兼正白旗蒙古副都統八月署管理光祿寺事務右翼總兵九月署管理戶部三庫事務十月署左翼前鋒統領十一年六月署正白旗漢軍都統仍兼署左翼前鋒統領七月調鑲藍旗滿洲副都統八月署鑲藍旗漢軍都統九月充順天鄉試副考官十月補都察院左都御史兼正白旗蒙古都統尋授兵部尙書命馳往甘肅查辦事件充實錄館總裁復賜紫禁城騎馬同治元年正月命以兵部尙書協辦大學士尋卒署陝甘總督沈兆霖以遺摺奏聞諭曰協辦大學士兵部尙書麟魁品學端方老成練達由翰林洊擢正卿歷受三朝知遇上年冬間派往甘肅查辦事件本年復簡授協辦大學士倚畀方殷茲聞於蘭州差次因病出缺披覽遺章拳拳國事並知其途感

受風寒不遑休息到蘭數日遽爾溘逝洵屬歿於王事痛惜良深麟魁著加恩照大學士例賜卹任內一切處分悉予開復應得卹典該衙門察例具奏其靈柩回京著沿途地方官妥爲照料並准其入城治喪伊子候選員外郎恩壽著賞給舉人准其一體會試用示篤念蓋臣至意尋賜祭葬予諡文端子恩壽四川成都府知府

張祥河

張祥河江蘇婁縣人嘉慶二十五年進士以內閣中書用道光四年補官充軍機章京七年陞戶部主事八年充福建鄉試副考官十年七月平定回疆方畧書成祥河以纂修官得旨以員外郎遇缺奏補八月補員外郎十月陞郎中十一年京察一等記名以道府用八月充順天鄉試同考官十二月授山東督糧道十七年擢河南按察使旋丁父憂二十年服闋授河南按察使二十一年署布政使二十二年祥符大工合龍祥河以總理錢糧又率屬捐貲下部優敘並賞戴花翎二十三年捐助南河工需銀五千兩復以河南省自二十一年被水始終其事先後下部優敘二十四年陞廣西布政使二十五年丁母憂二十八年服闋二月授甘肅

布政使十二月擢陝西巡撫二十九年捐備江蘇賑銀賞加五級時西安同州等府有佩刀匪徒擾害閭閻祥河飭屬拏獲一百五名奏聞上嘉之三十年正月以前在甘肅藩司任內督辦清查舛錯鐫級留任文宗顯皇帝御極應詔陳言一述祖德宜纂成簡編以資觀法我朝文德武功超越前古載在聖訓者卷帙浩繁士民末由仰窺應請編纂成書頒示朝野俾得家置一編熟諳掌故咸仰列聖創業之艱難守成之不易凡用人行政一切因革損益釐然畢具足爲萬世之觀法矣一守成法宜慎選羣言以杜更張我朝立法詳備相繫相維求治者率由舊章無須別創新法方今詔開言路言之可備採擇者固多其不克施行者亦復不少總之法莫善於遵守政無取乎紛更惟在一人之乾斷獨裁焉一勵官方宜復舊制以杜倖進內閣爲絲綸之地學校爲教化所關今以生員充中書教官漫無區別請敕部更正中書不由舉人捐者改爲中書科中書教職不由廩貢捐者以佐雜改補俾示界限而復舊制庶清班不致溷淆而課士尤昭鄭重矣一厚民生宜加恩施以孚衆望也查直省民欠自道光二十年蠲免後計期已及十年其間展緩帶徵無力輸將者甚多可否敕部覈議因災民欠實屬力不能完者優予豁免以

沛皇仁而蘇民困至東南漕務勒折浮收諸弊應請重申巽命不憚誥誡之煩又西北開墾頗爲民累請寬展期限確查試種無效者概免陞課庶民力可紓而民望大慰矣疏入報聞咸豐二年二月奏請將原任陝西巡撫林則徐入祀名宦祠從之九月粵西會匪竄擾湖北祥河奏言興安一帶毗連楚境應舉行團練擇要防堵惟鄉勇良莠不齊易聚難散不如力行保甲爲緝奸良法上韙其言三年召來京四年三月授內閣學士兼禮部侍郎銜署吏部右侍郎四月實授十月賜紫禁城騎馬十一月轉左侍郎五年提督順天學政六年正月因病開缺回京三月署刑部左侍郎四月充朝考閱卷大臣八月署刑部右侍郎兼管順天府府尹事務十月復補吏部左侍郎七年奏於本籍捐置義田千畝以贍宗族諭曰張祥河捐置義田養贍宗族所捐田畝著江蘇巡撫飭令該地方官立冊存案載入志書不得私自賣買該侍郎敦本厚族古誼可風應得旌獎該部酌議具奏尋賞御書誼篤宗支扁額八年十月兼署順天府府尹十一月擢都察院左都御史充順天鄉試覆試閱卷大臣九年四月充考試試差並孝廉方正閱卷大臣五月授工部尙書十月充順天武鄉試監臨十年賞加太子太保銜十一年十一月因病奏請

開缺得旨賞假一月十二月續請開缺允之同治元年卒諭曰前任工部尚書張祥河學粹品端老成持重由進士歷官京秩簡放外任擢授封疆蒙皇考文宗顯皇帝特召來京洊陞工部尚書兼管順天府府尹事務服官中外疊掌文衡均能勤慎宣勞克盡厥職上年十月以來因猝中風寒疊次賞假調理迄未就痊准其開缺俾得安心調理茲聞溘逝悼惜殊深張祥河著照尚書例賜卹任內一切處分悉予開復應得卹典該衙門察例具奏尋賜祭葬予諡溫和子茂時戶部候補主事茂貴議敘主事福建漳平縣知縣茂長議敘主事孫聯恩一品廕生工部郎中

王慶雲

王慶雲福建閩縣人道光九年進士改翰林院庶吉士十二年散館授編修十四年充廣西鄉試正考官十七年提督貴州學政二十六年充文淵閣校理二十七年五月大考一等陞侍講學士旋充日講起居注官七月轉侍讀學士九月充武會試副考官二十九年遷通政使司副使三十年文宗顯皇帝御極疏陳時務四條一曰通言路一曰省例案一曰寬民力一曰重國計其重國計一條略言今正

供歲額四千五百萬歲出在四千萬以下而道光二十一年實徵止三千八百餘萬邇來實徵止二千八百萬夫旱潦事之偶然而歲歲輪流請緩鹽課歲額七百四十餘萬實徵常不及五百萬生齒日繁而銷鹽日絀南河之費嘉慶時止一百餘萬邇來遞增至三百五六十萬入少出多置之不問思爲一切苟且之計何如取自有之財詳悉講求地丁何以歲歲請緩鹽課何以處處絀銷河工何以年年報險必得弊之所在而革除之戶部政務繁重滿漢尙書侍郎須時時入署乃可共濟而責成功奏入上聽之時命中外大臣保舉人才禮部侍郎曾國藩以慶雲應詔三月擢詹事府詹事復充日講起居注官十二月稽察右翼覺羅學充文淵閣直閣事旋署順天府府尹咸豐元年五月陞戶部左侍郎兼管三庫事務仍署府尹尋偕直隸總督訥爾經額議覆內務府奏令莊頭增租佃戶勒限退地實關繫畿輔民生疾苦恭錄乾隆二十八年停設莊頭嘉慶五年戶部奏禁增租奪佃例案請敕內務府詳查原租不得任意取盈從之七月充順天鄉試監臨尋偕大學士管理戶部事務祁寯藻等會奏江寧蘇州安徽三藩司例應入撥各款延未造報自道光三年起至本年八月止共有一千五十九款共銀九百三十六

萬亟應予限分別清釐請旨嚴飭遵辦以裕經費允行又奏陳節流各款一嚴覈各省上下兩忙分別藩司功過一各省存贖款項按年抵撥一外省驛站留支贖款提存司庫一嚴查外任交代以杜新虧一甲米復放本色以節庫支一緞疋庫見存物料分別應抵應停一裁馬改步以務軍實皆取國家自有之財而理之果能實力奉行積久自收成效下所司議行十月充武會試較射大臣十二月命偕江蘇布政使聯英馳往山西會同巡撫兆那蘇圖查辦事件二年正月奏言河東商累一在鹽本貴一在浮費鉅一在運腳重從前鹽每石價三五十兩見貴至百三四十兩河東鹽行三省例規幾及歲課之半官吏罔恤商艱且陸運腳費定價不容加增相率攙沙短秤民食愈艱商民交困今欲輕鹽本必先定池價革浮費必先行票法減運腳必先分口岸將緝私之法分寓其中大要在留商改票先課後鹽鹽池滷氣濃厚總敷歲額價貴不在缺產而在走私見擬定價不許居奇售私官爲懲辦覈減錠票銷價總期成本減輕則價平而商鹽足例規永遠示禁每票徵辦公銀七分不准需索分毫將陝引並本省引與河南會興鎮設三路口岸各行各票鹽到口岸然後發販銷售商人自運亦聽其便攙沙短秤者嚴究統計

鹽價規例運腳歲可裁省銀七十餘萬兩儘有贏餘不至紛紛告退間有歇業者運商歸併坐商頂充二者無人運商按籤勻辦不准再有舉商流弊並附陳新章十四條下部議行三月兼署戶部右侍郎先是閩浙總督季芝昌等奏閩鹺疲累仍懇展緩勻代額課六月慶雲偕祁寯藻等疏言閩鹽引何以積銷何以滯私鹽充斥爲之也緝私力則銷暢奚憚加斤閩鹽本何以重利何以輕浮費繁重爲之也浮費裁則本輕何至虧折至稱全綱受病由淮鹽價賤江販絕迹致光建滯銷非暫停勻代不能挽救不知運途近則本輕價輕遠則本重價重淮鹽之賤實由浮費大裁若較運途則自淮達江至建昌等屬向之千里者今不能減而九百里閩省無論行票與否計本覈價浮費盡裁光建接壤江西仍愈淮南之鞭長莫及安見江販之不復行若變通既無從措手額課漸見短虧奚藉整頓虛名轉損實用且稱停勻代課六萬餘兩派認續倒課二萬餘兩不思五年之後勻代起徵倒課仍納前停者四萬五千後徵者八萬九千朝三暮四誠恐無此辦法原奏所稱窒礙四條均各省變通成法應請敕下該督等痛湔積習另籌良法如所議行七月充順天鄉試監臨八月偕祁寯藻等奏言江南賦甲他省全在認真稽覈凡應

徵應緩界畫不至侵欺乃該省蠲習每將災熟錢糧遞年牽混巧避處分致正供日絀查江南額徵共五百二十九萬道光十六年查豁前欠五百六十三萬約計十年蠲免一年之額二十六年查豁二十年以前民欠一千一十萬約計十年已蠲兩年及本年查豁該省三十年以前未完一千三百八十六萬是十年租賦幾至蠲免三年偏災原難豫定而約計十年比較今昔原不懸殊蠲緩年多一年無怪度支日困一日該省歷年報災將上年熟田未完混入次年緩徵有初參而無二參年年遞緩一遇覃恩全數蠲免趨避愈巧短絀愈多況熟田民無不完之理卽偶有蓄欠何至豁免數百鉅萬侵挪情弊顯然請敕下該督撫所有熟田未完不准混入次年緩徵如所請行是月充實錄館副總裁十月充武鄉試較射大臣三年正月偕祁寯藻等議覆季芝昌閩鹽課短商疲疏言該督等但稱辦理之難而未籌補救之法應令該督撫切實講求或再於就場徵課按包抽稅二條擇一可行之策另議具奏該督前奏光建受病因於准鹽減價江販絕迹見據署湖廣總督張亮基奏報逆匪滋擾准鹽不到請借粵引濟楚經部覈准在案九江防剿吃緊准鹽未到正可仿照借銷以閩鹺補准額二月又議覆江西巡撫張芾請撥

粵鹽濟銷疏言江西借撥粵鹽之案前明江西總制陳南金南贛巡撫王守仁因兵餉不敷將粵鹽設廠抽稅佐軍所謂不加賦而財足不擾民而事辦者法至善也今該撫請撥粵鹽濟銷卽師其意自宜速籌遵辦四月又疏陳滇黔銅本鉛本除抵扣外歲各不敷一百十萬兩上下尙需協撥而地居遙遠餉鞘經過各省因兵差截留協撥不前擬令於提鎮駐紮重兵之處籌鑄制錢附近水次添鑄大錢船運四川兩湖易銀楚蜀以所易大錢搭餉滇黔以易回銀兩配支准民間交納地丁稅課以便流通又奏言新疆南北兩路駐兵四萬歲需經費百三四十萬戡定垂及百年爲數萬萬勢有不能不變通者軍興數載籌款維艱再事因循後難爲繼防兵之費不費於防所費於沿邊防兵之疲不疲於無能疲於不久擬自本年爲始停調陝省官兵換防其喀什噶爾等八城設防卽由伊犁烏魯木齊綠營酌撥准於滿營通融調撥一律定爲五年更換可節省經費數十萬五月又奏粵賊滋事以來徵調兵逾十萬轉戰時歷三年其中有從征者有遣撤者有戰歿病故潰逃者兵已缺而餉猶存請敕各督撫查明存營出省兵數各路帶兵大臣查明在營兵數奏報由部臣磨對乘除可知缺額六月又議覆張亮基以湖廣借銷

鄰引官鹽價貴請飭四川兩廣覈實刪減疏言借運鄰鹽權宜補救本重價貴由於外費浮冒應令川廣大加裁汰兩湖接運腳費亦令撙節支銷又奏官鹽價昂由官吏巧立名色冒銷以致未大於本即使覈減亦僅足敵私於准課絲毫無補曷若化私爲官立廠抽稅凡川粵鹽斤到楚許民販鬻不必官運祇須扼要設關或稅本色或納折色十取一二稅後給照放行由各該省權宜辦理併飭川粵督撫招販運赴鄰封減半完課外費不得派攤以輕成本又議覆江西巡撫張芾奏招販給照借運浙鹽閩鹽疏言准鹽中梗課款無著應如所請試辦至買鹽銷鹽照內注定某縣恐有守候居奇之弊不若買鹽但注省分銷鹽但注府分應令妥籌咨覆該省既銷鄰省有課之鹽復完本岸無引之課誠恐本重難以敵私私販卽行闌入擬令設廠抽稅又議覆兩江總督怡良奏准綱奏銷俟軍務告竣疏言准引口岸雖間有賊氛而場產仍舊莫若設廠抽稅准綱弊在課重法繁抽稅輕則漏稅少而化私爲官立法簡則犯法少而化梟爲良請敕該督責成運司移駐通泰適中之地迅卽籌辦均允行七月充順天鄉試監臨十月充武鄉試較射大臣十一月疏請將山東河南河道歸兩巡撫管理河防裁東河河督南河河道

缺並兩河廳員盡行裁汰責成營員經理修防南河歲工不得過百萬東河不得過七八十萬並請裁漕督缺將盤掣僎運事宜歸南河總督兼管其僉弁造船派單兌運各事宜改歸有漕巡撫糧道分任淮安改設專鎮管轄漕標弁兵彈壓水手命下王大臣等議奏是月授陝西巡撫十二月捐助軍餉下部優敘四年二月粵匪竄擾河南陝西潼關朝邑韓城邠陽等處戒嚴慶雲督兵防禦並勸諭紳民製軍械修村堡挑濠壘募勇設防尋奏請將紳民捐項照籌餉例獎敘允之四月奏前赴潼關會同提督豐紳將軍扎拉芬相機防堵略言潼關背河面山夙稱天險風陵渡爲水路咽喉金陡關爲陸路鎖鑰與潼關犄角擬撥兵分駐設礮防守並於潼關西四十里之盤頭鎮添卡駐兵使聲勢相接請調甘肅兵千名以補防兵之缺得旨嘉獎尋由潼關赴商南親勘隘口五月奏言潼關池南過山卽雒南縣境雒南南與商州東南與商南接壤寸步皆山惟正東之雞頭關東出箭桿嶺與河南盧氏縣山路可通東北百二十里之盧靈關界隸盧氏靈寶兩縣西入商雒北走潼關皆有閒道盧靈見已駐兵防守復於雞頭關設卡飭紳民練勇防守以爲潼關屏蔽商南南接楚疆東連豫境縣南要隘曰梳洗樓曰新廟其總口在

青山縣東要隘曰界牌曰黑漆河其總口在富水關擬於梳洗樓專立一營於青山富水關結兩大營以備堵剿報聞尋又奏遵飭豐紳帶兵二千前往襄陽略言襄樊水陸交會必須厚集兵力則宛鄧自安而商雒亦資其屏蔽並以武昌失陷請將湖北省垣暫移襄陽至襄陽應需軍餉陝省恐獨力難支應由山西四川督撫協力籌濟襄樊保全大局又疏陳關中豐稔請停倉糧出易並查道倉存糧十二萬見值防堵吃緊暫行存留以備緩急又奏請各路糧臺銀糧兼支略言行軍首重芻糧未有專恃錢銀以充軍食者近例征兵不支粟米月支銀四兩五錢令其自行買食糧臺有銀錢而無糧草昔之軍餉一萬今增四五萬之數行營買食價昂今之兵丁領到百錢不敵三二十錢之用皆自不支粟米始以各省無從設措之銀供各路不可限量之餉仰食數千里外萬一餉匱立形渙散請敕各糧臺仿照舊例銀糧兼支或動項採買或就地捐輸或碾動鄰省倉穀協濟務使兵食足斯兵心固兵心固斯兵氣揚則餉不虛糜人皆自奮矣上嘉納焉下軍機大臣等議行十月以湖北襄河股匪盡滅襄陽解嚴奏請裁減潼關防兵留兵一千由扎拉芬督操俟直隸連鎮山東高唐等處肅清再遣歸伍允之十二月奏陝省刀

匪絡匪藐法行兇之案擬將軍流罪名加等定擬徒犯毋庸解配以大鍊鎖繫巨石五年杖罪鎖繫三年限滿自新族鄰保釋務消磨頑梗之氣庶匪徒斂迹以安善良又奏陝省行銷河東引鹽改爲官運官銷仍見窒礙擬將陝課照乾隆年間攤徵舊案以咸豐五年爲始隨同地丁開徵不准外加絲毫下部議行旋調山西巡撫五年三月因山西省城防務稍鬆奏請裁撤練勇酌留兩鎮兵防守並撤遼州和順防兵以節糜費旨如所請又奏潞鹽行銷山陝河南陝課改歸地丁攤徵患在鹽多晉省苦於價貴擬將陝引勻銷晉省三百七十名以輕成本晉引則就地遠近公平定價飭各屬暢滯許其通融領運惟河南官運已覺暢行擬兼行民運以廣招徠並附陳章程十四條下部議行六月以陽城縣匪徒趙連城抗糧拒官飭冀寧道瑞昌太原鎮總兵瑞格擒之並獲李聚泰王法固等均治如律九月奏晉省私鹽惟吉蘭泰花馬池鹽侵灌最甚查照嘉慶十七年禁止水運以杜來源請將汾州通判移駐磧口鎮量移營汛酌添河快巡船並准審理詞訟責令彈壓巡緝從之六年二月奏山西州縣間有刑仵代驗生傷者役賤人微難保不輕重任情殊非慎重人命之道請飭部添議州縣輒令刑仵代驗生傷處分專條下

部議行著爲令五月奏陝課攤入地丁復形窒礙請仿照河南招販兼行民運略言陝省課歸地丁輸納不前惟有仿照河南會興鎮章程於河東河西擇地設立總局委員稽查過河截角後各家自招民販隨處散銷毋許留難需索在陝不分引地不定例價與布帛菽粟同爲流通運無定人自不能擡價銷無定地自無可居奇允行又奏言軍興以來各軍營以銀出納官兵以銀易錢買糧果使歲豐銀足何便如之今用兵省分賦稅不全仰給鄰省完善之區正供不足佐以捐輸皆非久計而擾民之政更不可行之多事之秋本年安徽亢旱江寧飛蝗當此穀貴錢荒以銀易錢以錢易糧損折大半往時兵飢得銀可飽恐此後得銀亦不可飽況銀且不可常繼非兼籌並運何以濟兵食而安軍心若由州縣碾動倉穀解餉兼運制錢舟楫可通宜無不便運錢運米雖似迂談而兵丁得米得錢均霑實惠如所請行十一月奏晉省前明三邊烽火達於太原郡縣率民築堡自衛一縣十餘堡至百數十堡星羅碁布爲他省所無今惟雲中代朔堡寨相連省南各屬則多殘缺不知無事時之堡寨卽有事時之堅壁早爲繕完事半功倍且晉俗有足嘉者一堡一寨必有社廟社廟必有規約董以紳耆猶有三老嗇夫助官爲治之

意擬告諭各屬勸修堡寨定社規責成紳耆董率立義學化導少壯遊惰合祭賽以聯其情相守望以齊其力小村附入大村大里帶管小里零戶資糧寄頓堡寨有事則聚守無事則散居寓堅壁清野之法於無形衛民之計無便於此上睦之又以河南南陽一帶向多搶匪復值上年旱蝗民飢請諭該省發倉籌賑俾飢民不爲土匪勾脅以救災弭患嗣搶匪游勇竄擾南陽府陷內鄉圍淅川延及魯山縣界連山西慶雲密陳邊防機宜省南沿邊略分三路東路以潞澤營參將總巡澤州都司爲之副西路以蒲州副將總巡運城都司爲之副中路平垣營遊擊駐茅津渡北巡風門口南巡會興鎮使聲勢聯絡報聞七年六月陞四川總督八月入覲十二月貴州思南府教匪倡亂府城失守慶雲檄候補直隸州知州李漸鴻副將鄒鸞章防守西秀堵扼龔灘請飭駐兵貴州鎮遠之川北鎮總兵蔣玉龍繞出思南之北規復郡城聯絡西秀邊境八年正月奏貴州桐梓匪徒窺伺川境請撤回調赴湖北之雲南宣威州兵交重慶鎮總兵阜陞管帶會同重慶府知府李莊防堵綦江南川一帶其西秀防務責成李漸鴻鄒鸞章各就兵力所及移會鄰團以剿爲防勿使逼處窺伺又奏川省向多嘔匪盜劫案甲他省見飭各屬行保

甲禁包庇勒限查拏逸犯半載以來擒斬徐捷沉等九十一名盜風漸戢四月奏
酉陽州毗連黔楚苗疆省垣鞭長莫及前署知州凌樹棠因楚氛不靖捐設屯田
仿照湖南鳳凰廳成案於城鄉要隘分設屯兵計丁授田農隙操演其常操者給
月餉揀弁管帶建營房置器械寓兵於農分布城鄉與營汛分駐操防屯弁兵丁
歸川東道統轄免其徵調境外川省幅員遼闊沿邊州縣如有能仿照舉行者均
請量予獎敘七月奏川省差役每於奉票緝案傳證起贓輒糾多人持械搜掠名
曰埽通甚有教賊誣扳因而埽通者其迹與強盜無殊其情較強盜更重擬請從
嚴照強盜定律凡得財者不分首從皆斬同行助惡之犯照強盜新章問擬情節
重者加梟兵丁有犯照差役擬斷均下部議行九月以黔匪焚掠漸近綦南派防
兵出境剿復層巒山攻克各洞進攻飛梯巖賊巢救出難民婦女數百會西秀防
兵亦豫約黔兵出境夾擊西秀兵先遇賊敗之窮追四十餘里至胡家坪賊勢窮
蹙而黔兵迄未來會李漸鴻凌樹棠遇伏陣亡慶雲檄綿州知州毛震壽往援攻
克胡家坪賊巢擒賊首胡二黑斬之九年正月奏川省驛站夫馬不敷借資民力
請禁伴送土司之員弁刁難需索出師帶兵官縱容所部行兇者以軍法從事允

行二月兼署成都將軍四月調兩廣總督因病乞假一月九月行抵湖北漢陽府以病劇奏請開缺允之又奏言宋臣韓琦范仲淹同上禦戎四策以和好爲權宜以戰守爲實事臣思能戰而後守可固能守而後和可久防備之具弛之甚易張之甚難上嘉其老謀成算諭令病痊卽行來京十一年七月以捐輸京餉下部優敘十月授都察院左都御史命卽來京供職十二月疏陳病體未痊未能卽時就道旋擢工部尙書同治元年正月奏言洋煙流毒甚烈官員士子武弁兵丁所關尤重請旨嚴禁犯者予限一年戒革上嘉其切中窾要如所議行三月卒遺疏入諭曰工部尙書王慶雲服官中外懋著勤勞由翰林洊陞兩廣總督因病開缺調理嗣以求才孔亟降旨徵召特授都察院左都御史旋陞工部尙書方期迅速來京重資倚畀乃於起程之前一日猝因痰疾溘逝遺章披覽悼惜殊深王慶雲著照尙書例賜卹任內一切處分悉予開復應得卹典該衙門察例具奏尋賜祭葬予諡文勤三年入祀山西名宦祠孫仁堪光緒三年一甲一名進士蘇州府知府循吏有傳仁東舉人內閣中書浙江候補同知

